

PAULO TỸ CARTA HAN: ROMA TÁ KE AG MỸ CARTA

¹ Paulo tỹ rá vễ. Isỹ cidade tỹ Roma tá ke ag mỹ rán ken hã vễ.

Tỹ sóg Jesus Cristo camarada nĩ, kỹ tóg inh fễg, isỹ tỹ apóstolo nĩ jé. Hã jé tóg inh jé prêr. Kỹ tóg inh kuprễg gé, isỹ vễnh kar mỹ vễnh vĩ sér kãmén jé, Topễ tỹ ễg mỹ vễnh vĩ jễnễ ja ễn ti.

² Topễ vỹ vẫsỹ ã vĩ tó ti ag mỹ: “ha inh kósin kãme tó,” he ja nĩgtĩ, kỹ ag tóg ti kãme rán ja nĩgtĩ gé, ag tỹ Topễ vĩ rán kỹ.

³ Topễ kósin ễn tó ja ag tóg nĩgtĩ, ễg Senhor tỹ Jesus Cristo ti. Tỹ tóg vẫsỹ pã'i mág tỹ Davi kósin nĩ, Jesus ti. Ti jóg'jóg ve hã vễ, Davi ti.

⁴ Ti tỹ tỹ Davi kósin nĩn kỹ tóg tỹ ềprã ke nĩ, Davi ri ke, hã ra tóg tỹ Topễ kósin nĩ gé, hã kỹ tóg ã ter kar kỹ rĩr mẫn ja nĩ. Topễ tỹ ti rĩn mẫn to ễg tóg ti tỹ tỹ Topễ kósin nĩn ki kanhró nỹtĩ. Topễ vỹ ti tỹ ẫn mág han mũ gé sir, ễg Senhor tỹ Jesus tỹ.

⁵ Topễ hã ne isar han', Jesus tigrĩn. Ti hã ne inh fễg', isỹ tỹ apóstolo nĩn jé, isỹ fóg ag kar mỹ ti kãmén jé, kanhgág ag mỹ ke gé, ag tỹ ti ki ge jé, ti vĩ kri fi jé, ti vĩ kri nĩm jé, ti jiji mẽ kỹ.

⁶ Ừ tỹ inh vĩ mẽg mũ vỹ tỹ ẫjag nỹtĩ gé.

Topễ vỹ ẫjag kuprễg, hã kỹ ẫjag vỹ tỹ Jesus Cristo tũ nỹtĩ.

⁷ Kỹ sóg ẫjag mỹ vễnhrá jễnễg mũ, Topễ tỹ ẫjag to há nĩn kỹ. Cidade tỹ Roma tá ẫjag tóg nỹtĩ. Topễ ne ẫjag kuprễg', hã kỹ ẫjag vỹ tỹ ti tũ nỹtĩ. Hã kỹ

sóg ěg jóg tỹ Topě mỹ: “ag tar han nĩ, ag mỹ vėnh jykre kusa nĩm nĩ,” he tĩ, Topě mỹ, ěg Senhor tỹ Jesus Cristo mỹ ke gé.

Paulo tỹ Roma tá ke ag ve sór

⁸ Ha mẽ, vėnh kar vỹ ājag tỹ ti ki ge kỹ nỹtĩ tag mẽ huri, kỹ sóg ājag to Topě mỹ vĩ há han tĩ, Jesus Cristo tugrĩn. Ti hã mré sóg vėmėn tĩ.

⁹ Ti hã mỹ sóg rãnrãj tĩ, to krónh ke vãnh sóg nĩgtĩ, hã kỹ sóg ti kósin to vėme sér ěn tó tĩ. Ti hã mré sóg ājag jagfy vĩ tĩ gé, kỹ tóg ki kanhró nĩ. Kurã kar ki sóg ājag kãmėn tĩgtĩ, ti mỹ.

¹⁰ Isỹ ti mré vėmėn kỹ sóg ājag tó tĩ. Ti mỹ sóg sỹ kejėn ājag ve sór mũ tó tĩ. Ti tỹ kejėn sỹ ājag venh ke to há nĩn kỹ tóg inh mỹ: hej, henh ke mũ.

¹¹ Ājag ve sór tãvĩ inh nĩgtĩ, sỹ ājag mỹ Topě kuprĩg tỹ inh kanhrãn ja ěn kãmėn jé, ājag tỹ inh vĩ jėmėn kỹ tar nỹtĩ jé.

¹² Kỹ ěg tóg jagnė tar han ke mũ sir, ěg tỹ jagnė jykre ven kỹ, ājag tỹ isỹ Jesus ki rã kỹ nĩ ven kỹ, isỹ ājag tỹ ti ki ge kỹ nỹtĩ ven kỹ ke gé.

¹³ Inh kanhkã', inh mỹ tóg ājag tỹ tag ki kanhró nỹtĩnh há tĩ, ha mẽ: ājag venh tĩg ke to inh jykren tỹ hėn ri ke han huri, hã ra tóg inh mỹ ki króm ja tũ nĩ ver. Isỹ ājag mỹ Topě vĩ kãmėn sór vė, Roma ki ke ũ ag mỹ ke gé, ag kãmĩ ũ tỹ Topě ki ge jé. Fóg kar mỹ sóg ke tĩ, kỹ tóg inh mỹ sér tĩnh mũ, sỹ Roma tá tónh ke mũn kỹ ke gé.

¹⁴ Fóg tỹ Grego ag mỹ sóg Topě vĩ tó tĩ, fóg kar ag mỹ ke gé, kanhgág ag mỹ ke gé, ũ tỹ nėn ũ ki kanhró ag mỹ, ũ tỹ nėn ũ ki kagtĩg ag mỹ ke gé. Topě vỹ inh mỹ: “ha ag mỹ tó,” he ja nĩgtĩ.

15 Hã kÿ sóg Roma tá ti tó sór mũ gé, Topẽ vĩ sér ãn ti.

Topẽ jykre tar

16 Inh pi(jé) Topẽ vĩ sér tag to mÿ'ãg sór mũ'. Topẽ hã ne tag to ãg kren han tí', ãg tÿ kri fin kÿ. Topẽ jykre tar hã vễ. Judeu ag kren han sór tóg mũ, kar kÿ fóg kar ag ke gé, kanhgág ag ke gé.

17 Tag hã ki ãg tóg Topẽ jykre ki kanhró nÿtĩnh mũ, Topẽ vĩ sér hã ki. ãg tÿ ti ki rã hã kÿ ãg tóg ti mÿ kuryj nÿtĩ. Hã kÿ tag tóg rán kÿ nĩ, ha mẽ: “ãg tÿ Topẽ ki rã hã tugnĩn ãg tóg ti mÿ kuryj nÿtĩnh ke mũ, kÿ ãg rĩnrĩr mãn ke mũ,” he ja tóg nĩ, Topẽ vĩ rán ki.

Ëprã ke ag jykre pãno

18 Hã ra Topẽ tóg jũ nĩ gé, kanhkã tá. Û tÿ ti ki ãkrég tũ ag to tóg jũ mũ. Topẽ vÿ ag mÿ tÿ nén ù tũ nĩ, hã kÿ ag tóg vễnh jykre kuryj han sór tũ nĩgtĩ. Vễnh vĩ há tÿ ag tóg tũg' he sór tĩ gé, vễnh jykre kórég han sór kÿ.

19 Topẽ jykre há nÿtĩn hã ki kanhró ag tóg nÿtĩ vễ, ag tÿ ki kanhrãn sór kÿ. Topẽ vÿ ãg kar mÿ tag ven tĩ.

20 Ëg pi(jé) Topẽ vég tĩ'. Hã ra tóg nén ù kar han, ãg tÿ nén vég mũ kar. ãn vigve kÿ ãg tóg ti jykre mág nĩ ãn ki kanhró nĩ sir. “Û tÿ tag han mũ vÿ tÿ ùn mág nĩ,” he jé ãg tóg ke mũ. “ãn jykre vÿ tar nĩ, ãn hÿn tóg tũ' henh ke tũ nĩ,” he jé ãg tóg ke mũ, ãg tÿ Topẽ tÿ nén han ja vigve kÿ. Hã ra ag tóg ki kanhrãn jãvãnh nÿtĩ, hã kÿ Topẽ tóg ag to jũnh ke mũ, hã ra ag tÿ ne tónh ke tóg tũ tĩnh mũ.

²¹ Ti tỹ tỹ Topẽ nĩn ki kanhró ag tóg nỹtĩ vễ, hã ra ag tóg ti to: “Topẽ vễ,” he tũ nĩgtĩ. Ti tỹ tỹ ùn mág nĩ tag tó sór tũ ag tóg nĩgtĩ. Ti mỹ ag: “inh mỹ tóg há tĩ,” he ja tũ nĩgtĩ gé, ti tỹ ag ki rĩr há han mũ ra. Hã kỹ ag tóg ag tỹ krĩ há ra ki kagtĩg nỹtĩ sir, ag krĩ há tóg tũ' he ja nĩgtĩ sir. Nén ù há to jykrén mũ ki kagtĩg ag nỹtĩ ha.

²² “Ki kanhró mág inh nĩ,” he ag tóg tĩ, hã ra ag tóg krĩ vễnhmỹ nỹtĩ ha.

²³ Kỹ ag tóg Topẽ pẽ tag jẽgja kã, ùn ter vãnh tag jẽgja kã ag tóg sir ẽprã ke kãggrá fẽg mũ sir, ẽprã ke ag kãgter tĩn ra. Sēsĩ kãggrá vin ag ke gé, bicho tỹ fa tỹ 4 ag kãggrá ke gé, pỹn kãggrá ke gé. Tag vỹ ag mỹ tỹ topẽ nỹtĩ sir.

²⁴ Hã kỹ Topẽ tóg ag tovãnh mũ sir. Ag tỹ ãjag tỹ nén to én mũ ẽn han sór nỹtĩn kỹ tóg ag tovãnh mũ, ag tỹ han jé. Jagnẽ kavénh ag tóg mũ sir.

²⁵ Topẽ vĩ há kri fi vãnh ra ag tóg vễnh ó há kri nĩm tĩ. Ag tỹ ù tỹ nén ù kar han ja ẽn to: “Topẽ vễ,” henh ke vễ vễ, hã ra ag tóg ti tỹ nén han ja to: “Topẽ vễ,” he sór mũ, ón kỹ. Û tỹ nén ù kar han mũ hã ne ã pir mỹ tỹ ùn mág nĩ', ti hã mỹ ẽg tóg vĩ há han ke mũ'. To krónh ke vãnh ẽg nỹtĩ. Amém.

²⁶ Ag tỹ Topẽ tỹ nén han ja to: “Topẽ vễ,” hen kỹ Topẽ tóg ag togvãnh gé, ag tỹ ãjag tỹ nén to én mũ ẽn han jé, ẽg kavénh tĩ ẽn ti. Ag prũ fag tỹ ag mré nỹ tũg kỹ fag tóg jag(nẽ) hã mré ti vễnhmỹ han mũ sir, mỹr, ha mẽ.

²⁷ Kỹ fag mén ag tóg ãjag prũ fag mré nỹ tovãnh kỹ jagnẽ to én mũ gé sir. Jagnẽ to én kỹ ag tóg jagnẽ mré nỹ kỹ ti kórég han mũ gé sir, jagnẽ kavénh kỹ. Hã kỹ ag tóg ag tỹ Topẽ tovãnh to jagãgtar nỹtĩnh

mũ. Ti tỹ ag vóg kónãh hã vễ.

²⁸ Ve ra ha. Topễ ki ẽkrén jãvãnh ag tóg nỹtĩ, ti to é he kỹ. Hã kỹ Topễ tóg ag togvãnh ja nĩgtĩ gé sir, vễnh kato, ag tỹ vễnh jykre pãno han sór kỹ. “Ha han, ge kỹ sir,” he ja tóg nĩgtĩ.

²⁹ Vễnh jykre pãno tỹ ag fór nỹtĩ ha, ti kórég tãvĩ tỹ. Nén kar to én (ka)mễ ag nỹtĩ. Vễnh jykre kuryj han vãnh ag nỹtĩ. Jagnễ tũ to én (ka)mễ ag nỹtĩ. Jagnễ kãgtén ag tóg tĩ gé. Jagnễ vĩ kafãn ag tóg tĩ gé. Jagnễ mỹ un’ón ag tóg tĩ gé. Jagnễ krĩn kónãh ag tóg tĩ gé. Jagnễ to vĩ kónãh ag tóg tĩ gé.

³⁰ Jagnễ to un’ón ag tóg tĩ gé. Topễ kato tễ mág ag tóg nỹtĩ. Jagnễ vóg kónãh ag tóg tĩ. “Ag kãfór vỹ tỹ inh nĩ,” he ag tóg tĩ, kỹ ag tóg vễso nén ũ há tó tĩ, ón kỹ. “Inh hỹn vễnh jykre pãno tỹ ne han mũ, ũri?” he ag tóg tĩ, kurã kar ki. Ajag mỹnh fag vĩ han vãnh ag tóg nỹtĩ gé, ajag panh ag vĩ ti.

³¹ Krĩ tũ ag nỹtĩ. Ón kỹ ag tóg jagnễ mré nén kar to jykren tĩ, ajag tỹ ki króm ke tũ (hã) ra. Jagnễ mré há nỹtĩ ki kagtĩg ag nỹtĩ, kỹ ag tóg jagnễ jagãgtãn ki kagtĩg nỹtĩ gé.

³² Topễ vỹ ũ tỹ tag han mũ to: “kãgter jé ag tóg ke mũ,” he ja nĩgtĩ. Ag tỹ tag ki kanhró nỹtĩ ra ag tóg han mũ sir, kỹ ag tóg ũ tỹ tag han mũ to há nỹtĩ gé, mỹr, ha mẽ.

2

Topễ tỹ vễnh jykre pãno to jũ

¹ Fóg mré kanhgág ag vỹ vễnh jykre kórég tag hyn han kãn tĩ, kỹ ag tóg Judeu ag mỹ kórég nỹtĩ. Hã ra Judeu ag vỹ ti kórég han tĩ gé, ag tỹ ón kỹ ag to vĩ mũ ra. “Kórég ag nỹtĩ,” he ag tóg tĩ, hã ra ag tóg fóg

jykre kórég ěn han tĩ gé, kanhgág jykre kórég ti ke gé. Hã kŷ ag tóg ãjag jykre tugnĩn ti kórég venh ke mũ gé.

² Topě vŷ ũ tŷ tag han mũ vóg kónãn ke mũ, ti jykre kuryj nĩn kŷ, Topě ti. Ti tŷ ke há vĕ.

³ Ũn jykre kórég ag tóg ag mŷ kórég nŷtĩ, Judeu ag mŷ, hã ra ag tóg hã han tĩ gé. Kŷ ag hŷn ě ě ri kenh mũ, Topě tŷ ag vóg kónãn tũ nĩ jé? Ag vóg kónãn jé tóg ke mũ, ha vemnĩ.

⁴ Ver tóg ěg to há nĩ, ver tóg ěg to fen nĩnh mũ, ver tóg jũ vãnh nĩ, Topě ti. Ti tŷ ěg tŷ ěg jykre kórég tovãnh ve sór vĕ, hã kŷ tóg ver ěg to há tãvĩ nĩ. Hã ra tóg ag mŷ tŷ nén ũ tũ nĩ ve nĩ, Topě tŷ ěg to fen nĩnh ke mũ ti.

⁵ Kutu ag nŷtĩ, vĕnh jykre pãno tovãnh jãvãnh ag nŷtĩ, hã kŷ Topě tŷ ag to jũ tóg komĕr hã mág rã nĩ. Kejĕn tóg Topě tŷ vĕnh kar jykre venh ke kurã pétĕm ke mũ sir. Kŷ ag tóg venh ke mũ, Topě tŷ ag vóg kónãn ke ti, kŷ vĕnh kar vŷ ti jykre kuryj venh ke mũ, ti tŷ ěg mŷ ki hã tó mũ ti.

⁶ Ti hã ne ěg mŷ nĩm ke mũ', ěg tŷ nén hyn han ja ěn kaja ti.

⁷ ěn kã tóg ěg mŷ ěg rĩr krŷg ja tũ ven ke mũ, ũn jykre kuryj ag mŷ. ěg tŷ ti jykre há to tar nŷtĩn kŷ tóg ěg mŷ ěg rĩr krŷg ja tũ ven ke mũ, ěg tŷ tá tŷ ũn mág nŷtĩ sór kŷ, ěg tŷ Topě hã tŷ ěg mŷ vĩ há han ke ve sór kŷ, ěg tŷ ěg rĩr krŷg ja tũ ve sór kŷ. Kŷ tóg ěg mŷ ven ke mũ.

⁸ Hã ra tóg ũ vóg kónãn ke mũ gé. Ũ tóg ãjag tŷ nén han sór mũ ěn hã han tĩ. Vĕnh vĩ há kri fi vãnh ag nŷtĩ, ag tŷ vĕnh jykre pãno hyn han sór kŷ. Hã kŷ tóg ag vóg kónãn ke mũ.

⁹ Û tỹ vĕnh jykre pãno han mũ kar vỹ kanĕ junjur ke mũ, jagtar jagy hyn han kỹ. Ag tỹ tỹ Judeu nỹtĩ ra ag tóg jagãgtar ke mũ, kar kỹ fóg kar ag ke gé, kanhgág ag ke gé.

¹⁰ Û tỹ vĕnh jykre kuryj han mũ tỹ tóg ùn mág hyn han ke mũ hã ra, to tóg vĩ há han ke mũ, ěg mỹ tóg vĕnh jykre kusa nĩm ke mũ, ěg tỹ tỹ Judeu nỹtĩ ra, kar kỹ fóg ag mỹ ke gé, kanhgág ag mỹ ke gé.

¹¹ Ha vé, Topĕ mỹ ti tỹ nén ù tũ nĩ, Judeu ag, fóg ag, kanhgág ag. Ti mỹ ěg tóg tỹ ùn pir nỹtĩ.

¹² Û ag tóg Topĕ vĩ mẽ ja tũ nỹtĩ. Kỹ ag tóg ti kórég kar hyn han mũ sir. Kỹ ag tóg nũgme ki vár ke mũ sir, inferno ki, ag jykre kórég to. Ag jãvo Judeu ag vỹ Topĕ vĩ mẽ ja nĩgtĩ. Hã ra ag tóg ti kórég han tĩ gé. Kỹ Topĕ tóg ag vóg kónãn ke mũ gé sir. “Isỹ ãjag mỹ nén tó ja ěn han ja tũ ãjag nỹtĩ,” he jé tóg ke mũ.

¹³ Ha vé, ěg tỹ Topĕ vĩ mĕg mũ ra han tũ nĩn kỹ ěg Topĕ mỹ há tũ nỹtĩ. ěg tỹ ti vĩ ki króm kỹ ěg tóg ti mỹ kuryj nỹtĩ.

¹⁴ Fóg ag mré kanhgág ag vỹ Topĕ vĩ mẽ ja tũ nĩ ver, ù tỹ Judeu jykre han tũ kar ag. Ge ra vĕnh jykre há tóg ag mỹ sér tĩ, ag tỹ Topĕ vĩ mẽ ja tũ (hã) ra. Kỹ ag tỹ vĕnh jykre há han sór mũ tag vỹ ag mỹ ag tỹ ki króm han jafã nĩ.

¹⁵ Topĕ tỹ nén tó ja ěn vỹ ag kãkã nĩ, hã kỹ ag tóg han sór mũ, ag tỹ mẽ ja tũ ra. Hã kỹ tóg ag mỹ sér tĩ, ag tỹ nén ù há han kỹ. Jãvo tóg ag mỹ e tĩ, ag tỹ ti kórég han kỹ. Ag tỹ Topĕ vĩ mẽ ja tũ ra ag tóg vĕnh jykre há ki kanhró nỹtĩ.

¹⁶ Kejĕn Topĕ tóg Jesus Cristo mỹ: “ag jykre ve kãn nĩ,” henh ke mũ, ti kurã ěn kã. Kỹ vĕnh kar jykre vỹ vĕnh ven ke mũ, ag jykre kórég mré hã,

ag tỹ vĕnh kar vatánh tá nĕn han ja ti. Tag hã tó sóg tĩ, sỹ vĕnh kar mỹ ti vĩ sér kãmĕn kỹ.

Judeu ag tỹ Topĕ vĩ mranh ja

¹⁷ Ha vé, Judeu ag mỹ tóg sér tĩ, ag tỹ tỹ Judeu nỹtĩn kỹ. “Topĕ ne ěg jyvĕn ja nĩgtĩ’, kỹ ěg nũgme ki vár ke tũ nĩ,” he ag tóg tĩ. “Topĕ to ěg há nỹtĩ,” he ag tóg tĩ gé.

¹⁸ Ti tỹ ěg ki nĕn ve sór mũ ki kanhró ag tóg nỹtĩ. Ti vĩ ki tóg rán kỹ nĩ, hã kỹ ag tóg ěn ve kỹ vĕnh jykre kuryj ki kanhró nỹtĩ.

¹⁹ “Ki kanhró ěg nỹtĩ,” he ag tóg tĩ, hã kỹ ag tóg ũ tỹ ki kagtĩg ag mỹ tó tĩ, Judeu ag, ag tỹ ag mỹ ũn kyvó ag ri ke nỹtĩn kỹ. Kuty mũ ag tóg mũgtĩ, kỹ ag tóg ag mỹ jĕngrĕ han sór tĩ, ag mỹ Topĕ vĩ tó kỹ.

²⁰ Ũ tỹ ki kagtĩg ag kanhrãn ag tóg tĩ, gĩr ag ke gé. “Topĕ vĩ vỹ há nĩ, vĕnh jykre há vĕ, ki hã tóg tó tĩ, hã to ěg Topĕ ki kanhrãn tĩ,” he ag tóg tĩ.

²¹ Ón kỹ ag tóg ũ ag kanhrãn tĩ, ãjag tỹ ki kagtĩg nỹtĩ (hã) ra. Ũ mỹ ag tóg: “nĕn ũ péju(g) tũg nĩ,” he tĩ. Hã ra ag tóg ũ tũ péju(g) tĩ.

²² Ón kỹ ag tóg: “ã prũ tũ fi mré nỹ tũg nĩ, ã mén tũ mré nỹ tũg nĩ gé,” he tĩ. Hã ra ag tóg fag mré nỹgnỹ tĩ. Ón kỹ ag tóg vĕnh kãggrá tỹ topĕ to: “Topĕ pijé’,” he tĩ. Hã ra ag tóg vĕnh kãggrá ag jo ĩn krĕm ag tũ péju(g) tĩ.

²³ “Topĕ vỹ ěg jyvĕn ja nĩgtĩ,” he ag tóg tĩ. Hã ra ag tóg ti vĩ mranh tĩ. Topĕ kavĕnh ag tóg tĩ.

²⁴ Hã kỹ tag tóg rán kỹ nĩ, Judeu ag to, Topĕ vĩ rán ki, ha mĕ: “ãjag jykre kórég ve kỹ fóg ag mré kanhgág ag vỹ Topĕ jykre to: kórég ti hỹn nĩ,” he tĩ, he ja tóg nĩgtĩ, Judeu ag to, Topĕ vĩ rán ki.

25 Há ti nĩ, ěg tỹ tỹ Judeu nỹtĩ ti, ěg tỹ Topě vĩ ki króm kỹ. Ěg tỹ hã ra ti vĩ mranh kỹ tóg ěg mỹ nén ũ há han ke tũ nĩ, ěg tỹ tỹ Judeu nỹtĩ ra. Fóg ri ke vỹ tỹ ěg nỹtĩ, kanhgág ri ke, ěg tỹ ti vĩ mranh kỹ.

26 Kejěn fóg ũ tóg sir Topě vĩ ki króm mũ sir, kanhgág ũ hěn ri ke mũn. Kỹ tóg Topě mỹ tỹ Judeu ri ke nĩ sir, ti tỹ Topě vĩ ki króm to.

27 Hã kỹ fóg ag mré kanhgág ag vỹ Judeu ag jykre kórég tónh ke mũ, ha vemnĩ, ag tỹ Topě vĩ ki króm kỹ. Topě vĩ mranh ag tóg tĩ, ag tỹ tỹ Judeu nỹtĩ ra, ag tỹ Topě vĩ rá vég nỹtĩ ra. Hã tó jé ag tóg ke mũ, fóg ag, kanhgág ag ke gé.

28-29 Ón kỹ ag tóg tỹ Judeu nỹtĩ, ag pi(jé) tỹ Topě tũ pě nỹtĩ'. Ón kỹ ag gré junun fár vỹ kym kỹ nĩ, Topě tỹ ag mỹ: “kym ra,” he ja nĩn kỹ. Kỹ ag tóg tag tugnĩn jagně mỹ: “Topě tũ vỹ tỹ ěg nỹtĩ,” he tĩ. Hã ra ag pi(jé) tag tigrĩn tỹ Topě tũ nỹtĩ'. Topě tũ ag vỹ ãjag fe tỹ ti ki rã tĩ, kỹ ag jykre hã ne kym kỹ nĩ ri ke nĩ'. Ag tỹ věnh jykre kórég tovãnh to ken hã vě. Topě kuprĩg ne ěg jykre há han tĩ', kỹ Topě tóg ěg mỹ vĩ há han tĩ gé sir, ěg jykre há nỹtĩn kỹ. Ti pi(jé) ěprã ke ri ke ón kỹ vĩ há han tĩ', ti ki ge kỹ nỹtĩ ag mỹ. Ěg hã vỹ tỹ Topě tũ pě nỹtĩ'.

3

1 Kỹ Judeu ag hỹn inh mỹ: “kỹn mỹ há tũ nĩ, ěg tỹ tỹ Judeu ag krě nỹtĩn kỹ?” he sór mũ. “Ěg gré junun fár kym kỹ nĩn kỹn mỹ tỹ nén ũ tũ nĩ?” he sór ag hỹn mũ.

2 Vó, há tävĩ ti nĩ gé. Ěg hã mỹ tóg ã vĩ ti tó ja nĩgtĩ, Topě ti, ěg tỹ tỹ Judeu krě nỹtĩn kỹ.

³ Ëg kãmĩ ù tóg ti vĩ kri fig tũ nĩgtĩ. Hã ra Topẽ pi(jé) ag tugrĩn ã tỹ nén tó ja ẽn han ke tũ nĩ', ag tỹ ti vĩ ki króm tũ ra tóg ã vĩ ki króm tĩ, Topẽ ti, ag jãvo.

⁴ Ti tỹ ãg mỹ tó ja ẽn han ti tĩ, ón vãnh ti nĩgtĩ. Ëprã ke ag ne un'ón tĩ', hã ra tóg ón ke tũ pẽ nĩ, Topẽ ti. Hã kỹ tag tóg rán kỹ nĩ, Topẽ vĩ rán ki, hã vỹ: “vãnh kar vỹ venh ke mũ, ã tỹ ã vĩ han tĩ ti,” he mũ. “Ủ tỹ ã jykre tugnỹm kỹ tóg venh ke mũ sir, ã tỹ ki hã tó tĩ ti,” he ja tóg nĩ, Topẽ to, Topẽ vĩ tỹ rán kỹ nĩ ki. Hã ra tóg ge nĩ.

⁵ Kỹ Judeu ag hỹn ón kỹ inh mỹ: “kỹn hỹn há nĩ, ãg jykre pãno ti,” he sór mũ. “Vãnh kar vỹ ãg jykre pãno ve kỹ Topẽ jykre kuryj nĩ ki kanhró nỹtĩ, ti tỹ ãg jãvo vãnh jykre pãno to há tũ nĩn kỹ. Hã kỹ ãg jykre pãno tag vỹ tỹ nén ù há nĩ. Hã ra tóg to ãg vóg kónãn sór mũ, ãg jykre pãno to, ti tỹ tỹ nén ù há nĩ ra. Tag tugnĩn tóg jykre pãno nĩ ve nĩ, Topẽ ti,” he sór ag hỹn mũ, Judeu ù ag. Ëprã ke ag vỹ ón kỹ vĩ tỹ ge han tĩ.

⁶ Hã ra tóg há tũ nĩ, ag vĩ tag ti. Topẽ jykre hã ne kuryj nĩ'. Ti jykre há nĩn kỹ tóg ãg jykre to: “há tũ ti nĩ,” henh ke mũ. Jykre kuryj ti nĩ inhhã.

⁷ Hã ra Judeu ù ag tóg ón kỹ: “vẽnhmỹ ãg ki króm kỹ nỹtĩ vỹ,” he tĩ gé. “Ëg ón tugrĩn Topẽ tỹ tỹ ùn mág nĩ tag vỹ vãnh ven mũ, ti ón vãnh vỹ vãnh ven mũ ãg jãvo. Há ti nĩ, tag ti. Hã kỹ ti tỹ ãg ón mũ tag to: “inh vĩ mranh ja ãgag tóg nĩgtĩ,” hen kỹ tóg vẽnhmỹn kỹ tó mũ, Topẽ ti,” he ag tóg tĩ, ón kỹ.

⁸ “Ti kórég han jé ãg tóg ke mũ, Topẽ tỹ ãg jykre kórég tỹ nén ù há han jé,” he ag tóg tĩ, ón kỹ. Kỹ ag tóg iso ón kỹ: “tag tó ti tĩ, Paulo ti,” he tĩ gé. Ủ tỹ tag

tó mũ ag vóg kónãn jé tóg ke mũ, Topě ti, ag ón mũ tag to, ti jykre kuryj nãn ky, ha vemnĩ.

Ěg kar tỹ Topě vĩ mranh kãn

⁹ Kĩ isỹ Judeu ag to ne tó nẽ? Ěg mỹ fóg ag kãfór nỹtĩ, ěg tỹ tỹ Judeu nỹtĩn kũ? Vó, ag kãfór tũ ěg nỹtĩ. Topě vĩ mranh kãn ěg mỹr, Judeu, fóg, kanhgág, ěg kar mỹr. Tag tó inh huri. Hã ra tóg ge nĩ.

¹⁰ Hã kũ tag tóg rán kũ nĩ gé, ha mẽ: “ũn jykre kuryj vỹ tũ tĩ, ũn jykre kuryj venh ke tũ pẽ ěg nĩgtĩ.

¹¹ Vẽnh jykre há han ki kagtĩg kar ěg nỹtĩ, ũ tỹ Topě jykre han sór mũ vỹ tũ tĩ.

¹² Ěg kar vỹ Topě japry, Topě jamĩn tovãnh kãn kũ nỹtĩ. Jykre kórég kar ěg nỹtĩ. Vẽnh jykre kuryj han vãnh ěg nỹtĩ. ũn jykre há venh ke tũ pẽ ěg nĩ.

¹³ Un'ón (ka)mẽ kar ěg nỹtĩ, jagně to. Ěg tỹ vëser to nón kũ vëser ger tóg kãkutě tĩ. Ěg ón vỹ vëser ger tag ri ke nĩ. Jagně mỹ ěg tóg un'ón tĩ gé. Ěg vỹ jũ tỹ ěg tóg jagně kãgtén ri ke han tĩ gé, kũ tóg pỹn veneno ri ke nĩ, ěg vỹ jũ ti.

¹⁴ Vẽnh vỹ jũ tỹ ěg fór nỹtĩ, kũ ěg tóg vẽnh kar mỹ vỹ kónãn tĩ.

¹⁵ Jagně kãgtén (ka)mẽ ěg nỹtĩ, tag hã tóg ěg mỹ sér tĩ.

¹⁶ Ěg tỹ hẽn mũ mũ kũ ěg tóg nén ũ kar kókég tĩ, hã kũ ěg mré ke fag vỹ jagtar nỹtĩ, ěg to.

¹⁷ Ěg pi(jé) vẽn h jykre kusa ve sór tĩ'.

¹⁸ Topě kamẽg sór vãnh ěg nỹtĩ,” he ja tóg nĩgtĩ, Topě vỹ tỹ rán kũ nĩ ki. Hã ra tóg ge nĩ.

¹⁹ Hã ra ěg kar vỹ tag ki kanhró nỹtĩ, ha mẽ. Ěg hã mỹ ti rán kũ nĩ, Topě vỹ ti, ěg tỹ ki króm jé. Hã ra ěg tóg mranh kãn. Kũ Topě tỹ ěg mỹ: “ti kórég han

ã,” he mũ ra tóg ãg tỹ ti mỹ ne tónh ke tóg tũ tĩ, ãg kar ti. Hã jé tóg ãg mỹ ã vĩ jẽnẽ ja nĩgtĩ, ãg tỹ to ãg kórég nĩ tag ki kanhrãn jé.

²⁰ Topẽ vĩ ki króm kãn ja tũ ãg tóg nỹtĩ, hã kỹ ãg kuryj tũ nỹtĩ, Topẽ mỹ. Hã kỹ ãg tỹ Topẽ tỹ vãsỹ ãg jyvẽn ja ãn mẽg mũ ra ãg tóg Topẽ vĩ mranh ki kanhrãn mũ, ti tỹ ãg mỹ: “tag han tũg ra,” hen kỹ. Ge ta ãg tóg mranh tĩ.

Topẽ tỹ ãg kren han sór

²¹⁻²² Vãhã Topẽ jykre kuryj tóg vẽn ven ja nĩgtĩ. Ti hã ne ãg mỹ vẽn pãte fón mũ sir', inhhã', ãg tỹ Jesus Cristo ki ge kỹ, ãg tỹ ti tỹ ãg jyvẽn ja ãn mranh ja (hã) ra. Ti jykre kuryj hã vẽn. Vãsỹ tóg tó ja nĩ, Topẽ ti, ti tỹ tag han ke ti. ã jykre si ki tóg tó ja nĩ, kỹ ti vĩ tó tĩ ag, profeta ãn ag tóg tó ja nĩgtĩ gé, ti jykre tãg ke ti. Ủ tỹ ti ki ge kỹ nỹtĩ kar mỹ tóg vẽn pãte fón tĩ. Kỹ ãg kar tóg jagnẽ ri ke nỹtĩ ha, ãg tỹ ti ki ge kỹ.

²³ Topẽ vĩ mranh kãn ãg, vẽn jykre kuryj han tũ ãg nỹtĩ, Topẽ jykre kuryj tag han ki kagtũg ãg nỹtĩ.

²⁴ Hã ra tóg ãg jagãgtãn kỹ ãg mỹ vẽn pãte fón sór mũ. Fagrĩnh mỹ ke vẽn, kajãm ke tũ ãg tóg nĩ. Jesus Cristo tugnĩn tóg ãg kren han sór mũ.

²⁵ Topẽ ne Jesus fẽg', ti hã tỹ ãg tỹ Topẽ vĩ mranh tỹ tũg' hen jé, ti ter kỹ ti kyvẽn tỹ ãg jagfy ti ki kãkutẽ kỹ. Kỹ ãg tóg ti ki rã kỹ há nỹtĩ sir, Topẽ jykre kuryj hã vẽn sir. Jesus to ãg ki kanhrãn mũ, vẽn jykre kuryj ti. Hã kỹ Topẽ tóg ãg tỹ vãsỹ ti vĩ mranh ja ãn to tóg ãg vóg ja tũ nĩ ver, ãg to fen kỹ,

²⁶ ti tỹ ùri ãg mỹ ã jykre tãg ven sór kỹ. Topẽ vĩ kuryj nĩ. Tĩ tỹ ãg mỹ vẽn pãte fón kỹ ãg ti mỹ

kugryj nýtĩ sir, ěg tỹ Jesus ki gen kỹ. Topě jykre kuryj hã vĕ sir.

²⁷ Kỹ Judeu ag hỹn inh mỹ: “kỹ ěg mỹ Topě mỹ há tũ nýtĩ, ěg tỹ ti vĩ ki króm sór mũ ra?” he sór mũ. Hỹ, hã vĕ. Kórég ěg nýtĩ, hã kỹ ěg tóg ti vĩ ki króm sór mũ ra mranh tĩ. Ěg tỹ ti ki ge kỹ tóg ěg mỹ vĕnh pãte fón tĩ, kỹ ěg há nýtĩ.

²⁸ Tag ki kanhró ěg nýtĩ, ha mẽ. Ěg tỹ Topě jykre si ěn han sór mũ ra ěg jykre pãno vỹ ěg kãkã nĩ nĩ. Ěg tỹ Jesus ki gen hã kỹ tóg ěg mỹ vĕnh pãte fón ke mũ hã ra.

²⁹ Topě pi(jé) Judeu ag tãvĩ vĕg nĩ nĩ'. Fóg ag vĕg ti nĩ gé, kanhgág ag ke gé.

³⁰ Pir ti nĩ, Topě ti. Hã kỹ tóg ũ tỹ ti ki ge mũ ag mỹ vĕnh pãte fón tĩ, Judeu ag mré hã, fóg ag mỹ ke gé, kanhgág ag mỹ ke gé. Ěg tỹ ti ki ge to tóg ěg mỹ vĕnh pãte fón tĩ, ěg kar mỹ.

³¹ Kỹ ěg mỹ ti ki ge kỹ (ěg mỹ) Topě tỹ vãsỹ ěg mỹ vĕnh jykre nĩm ja ěn tỹ tũg' he tĩ, Topě tỹ Judeu ag jyvĕn ja ěn ti? Vó. Vãhã ěg ki króm há han ki kanhró nýtĩ, Topě tỹ ěg mỹ vĕnh jykre nĩm ja ěn ki.

4

Topě tỹ Abraão mỹ vĕnh pãte fón

¹ Kỹ Judeu ag hỹn inh mỹ: “ěg jóg'jóg ve pĕ tỹ Abraão hỹn hĕ ri ke tĩ?” he sór mũ.

²⁻³ “Nén ũ há kar han ti tĩ, Abraão ti, hã tigrĩn tóg tỹ Topě mỹ ũn há nĩ,” he sór ag hỹn mũ, Judeu ag. Vó, hã tũ vĕ. Ti ki rã tugnĩn ke vĕ. Hã kỹ tag vỹ ti to rán kỹ nĩ, ha mẽ: “Abraão vỹ Topě ki rã, hã kỹ tóg tỹ Topě mỹ ũn há nĩ, ti tỹ ti ki rã tigrĩn,” he tóg mũ, Topě vĩ rán ki. Ti tỹ nén ũ há han tugnĩn Topě

mỹ tỹ ùn há nĩ ra tóg vēsō: “tỹ sóg ùn há nĩ, ag kar kǎfór,” henh ke mũ vễ, vễsỹ ùn há han sór kỹ. Hã ra ẽg vễsỹ ùn há han ki kagtĩg nỹtĩ.

⁴ Hã vé, ẽg rǎnhrāj to ẽg tóg ẽg rǎnhrāj kaja vég tĩ. Fagrĩnh mỹ ke tũ vễ, ẽg rǎnhrāj kaja ti.

⁵ Topẽ jykre vỹ ge tũ nĩgtĩ. Ẽg tỹ ti ki ge kỹ ẽg tóg ti mỹ tỹ, ùn há nỹtĩ. Ẽg tỹ ti ki ge tugrĩn tóg ẽg mỹ vễnh pǎte fón tĩ, ẽg tỹ ti vĩ mranh ja ti. Ẽg rǎnhrāj pijé'. Topẽ tỹ nén han mũn hã vễ.

⁶ Hã kỹ vǎsỹ ẽg pǎ'i tỹ Davi tóg tó ja nĩgtĩ gé. Ừ tỹ nén ù kórég han tĩ ẽn to tóg vĩ há han ja nĩ, Davi ti. Topẽ vỹ ẽg mỹ vễnh pǎte fón tĩ, ẽg tỹ ti vĩ mranh ja ti. Topẽ tỹ ùn mỹ vễnh pǎte fón ja ẽn to Davi tóg tag tó ja nĩgtĩ, ha mẽ:

⁷ “Topẽ vỹ ẽg ve há han ke mũ, hã kỹ tóg ẽg mỹ ẽg tỹ ti vĩ mranh ja ẽn tỹ vễnh pǎte fón tĩ. Kỹ ẽg ve mǎn ke tũ nĩ ha, ẽg jykre pǎno ja ẽn ti, ti tỹ vễnh pǎte fón kỹ nĩn kỹ.

⁸ Topẽ vỹ ẽg ve há han ke mũ, hã kỹ tóg ẽg mỹ ẽg tỹ ti vĩ mranh ja ẽn kaja kórég ẽn ven ke tũ pẽ nĩ,” he ja tóg nĩgtĩ, Davi ti.

⁹ Kỹ Judeu ag hỹn inh mỹ: “Davi hỹn ù tỹ hẽ to tag tó ja nĩgtĩ?” he sór mũ. “Judeu jykre han mũ ag to ke mỹ vó, ag jykre han tũ ag to ke mỹ vó?” he sór ag hỹn mũ. Ẽg kar to ke vễ. Hã vễ, Abraão to sóg: “ti tỹ Topẽ ki rǎ tugrĩn tóg tỹ Topẽ mỹ ùn há nĩ,” he ja nĩ.

¹⁰ Kỹ ti jykre tỹ Topẽ mỹ kuryj nĩ ẽn kǎ ti mỹ Judeu ag jykre han kỹ tĩ nĩ', Abraão ti'? Vó, ẽn kǎ ti ẽg jykre han tũ nĩ ver. Ẽn kǎ ti ã gré junun fár kym ja tũ nĩ ver.

¹¹ Topê vỹ ti mỹ vênh pãte fón, ti tỹ ti ki rã tugñĩn, ti tỹ ver Israel ag jykre ki kagtĩg nĩn kã. Ti mỹ vênh pãte fón kar kỹ Topê tóg ti mỹ ãg jykre tag nĩm ja nĩ, ti tỹ ã gré junun fãr kym jé sir, vênh kar tỹ ti jykre há nĩ ki kanhrãn jé. Hã kỹ tóg tỹ ù tỹ Topê ki ge mũ kar jóg nĩ sir, Abraão ti, ag tỹ Judeu ag jykre han tũ ra, ag tỹ ãjag fãr kym tũ ra ke gé. Topê ki ge kỹ ãg tóg Topê mỹ tỹ ùn há nỹtĩ, Abraão ri ke.

¹² Kỹ tóg tỹ Judeu jykre han mũ ag jóg'jóg ve pẽ nĩ gé sir, Abraão ti, ag tỹ ti mré Topê ki ge kỹ. Judeu jykre han to hã tóg Topê ki rã, ãg jóg tỹ Abraão ti. Kỹ ãg tỹ Topê ki ge kỹ tóg tỹ ãg jóg pẽ nĩ gé sir, ãg tỹ tỹ Judeu krẽ nỹtĩ ra Topê ki ge kỹ nỹtĩn kỹ.

¹³ Topê vỹ Abraão mỹ: “ã krẽ vỹ ga kar mũ mũnh mũ, kỹ tóg tỹ ag tũ kar nĩnh mũ,” he ja nĩgtĩ. Ti tỹ Topê vỹ kri fi tugrĩn tóg ti mỹ tag tó. Vênh jykre si ki króm tugñĩn ke pijé'. Ti tỹ Topê ki rã kỹ tóg ti mỹ tỹ ùn há nĩ, hã kỹ Topê tóg ti mỹ tag tó ja nĩ.

Topê tỹ ù tỹ ti ki ge kỹ nỹtĩ ag to há

¹⁴⁻¹⁵ Ha vé, ãg tỹ Topê tỹ vãsỹ ãg mỹ vênh jykre nĩm ja ãn han sór mũ ra ãg tóg mranh tĩ, kỹ Topê tóg ãg vóg kónãn ke mũ vẽ sir. Hã kỹ ãg tóg ti tỹ ãg mỹ nén ù há tó ja ãn venh ke tũ pẽ nĩ vẽ sir. ãg vóg kónãn jé tóg ke mũ vẽ sir, kỹ tóg ãg mỹ nén ù há nĩm ke tũ nĩ vẽ sir. Kỹ tóg ãg mỹ: “ha inh ki rã,” henh ke tũ nĩ vẽ gé. Topê tỹ ãg vóg kónãn ke mũ hã ne kã nĩ vẽ', ti vỹ mranh tugrĩn.

¹⁶ Hã ra tóg ãg mỹ: “ha inh ki rã, sỹ ãjag mỹ nén ù há ãn han jé, ãjag tỹ inh ki ge tugrĩn,” he ja nĩgtĩ. Ti tỹ ãg jagãgtãn hã vẽ. Topê tóg Abraão krẽ kar ag mỹ vin sór mũ, ã tỹ nén tó ja ãn. Ti pi(jé) Judeu jykre han mũ ag tãvĩ mỹ vin sór mũ'. ù tỹ Abraão ri ke

Topě ki ge mũ ag mỷ tóg vin sór mũ gé, Topě ti. Ęg kar jóg'jóg ve vỹ tỹ ti nĩ, Abraão ti.

17-18 Topě hã ne ti mỷ: “ã krě tỹ sóg povo e hyn han ke mũ,” he ja nĩ', hã kỹ tóg tỹ Ęg kar jóg'jóg ve pẽ nĩ. Rán kỹ ti nĩ, Topě vĩ rán ki. Kỹ tóg ti vĩ tag kri fi ja nĩgtĩ, Abraão ti, ã tỹ gĩr ve vãnh nĩ ra, ti kófa nĩn kỹ. Ũn ter mũ ag rĩnrĩr mãn han ki kanhró tóg nĩ, Topě ti. Kỹ tóg nén kar han ki kanhró nĩgtĩ gé. Nén ũ tóg tũ tĩ ver, hã ra Topě tóg nén ũ kar han tĩ, ã vĩ tỹ. Hã kỹ tóg Abraão mỷ ti kósin ke tó ja nĩgtĩ gé. Kỹ Abraão tóg ti vĩ kri fi ja nĩgtĩ. Ver tóg kósin ja tũ nĩ, ã kófa nĩ ra, hã ra tóg Topě vĩ kri fi ja nĩgtĩ, Topě tỹ ti mỷ: “ã krě tỹ sóg povo e hyn han ke mũ,” he ja tag to.

19-20 Topě tỹ ti mỷ tag tó kỹ tóg 100 (ke) anos pétêm, Abraão ti. Si há ti nĩ ja nĩgtĩ, ti prũ tỹ Sara fi ke gé. Gĩr han vãnh fag nỹtĩ, ěn kã. Ęn hã kã Topě tóg ti mỷ ti krě e hyn han ke tó ja nĩgtĩ. Kỹ tóg ti vĩ kri fi ja nĩgtĩ, to krónh ke tũ ja tóg nĩgtĩ. “Hỹ mỷ vỹ?” he ja tũ ti nĩgtĩ, Topě vĩ tag to. Ti vĩ kri fi kỹ tóg Topě to: “ũn mág vỹ tỹ ti nĩ,” he ja nĩgtĩ.

21 “Topě vỹ ã tỹ nén tó ja han ki kanhró nĩ,” he ja ti nĩ, Abraão ti, to krónh ke tũ nĩn kỹ.

22 Tag hã tugnĩn tóg Topě mỷ tỹ ũn há nĩ, ti tỹ ã fe tỹ ti ki rãn kỹ.

23 Topě vĩ tó tĩ ũ tóg Abraão to rán ja nĩ, Topě vĩ rán ki, ti tỹ Topě mỷ tỹ ũn há nĩ ti.

24 Hã ra tóg Ęg to rán ja nĩ gé. Topě mỷ Ęg tóg tỹ ũn há nỹtĩnh ke mũ gé, Abraão ri ke, Ęg tỹ ti ki ge kỹ. Hã kỹ tóg Ęg Senhor tỹ Jesus rĩn mãn ja nĩgtĩ, ti ter ja tá.

25 Ęg jagfy tóg ter ja nĩ, Jesus ti, ti tỹ Ęg tỹ Topě vĩ

mranh tỹ tũg' he jé. Hã jé Topẽ tóg ti fêg ja nĩ. Kỹ tóg ti rĩn mãn ja nĩ gé, ti tỹ êg mỹ vênh pãte fón jé, êg tỹ ti vĩ mranh ja ti.

5

Topẽ tỹ êg to jũ mãn ke tũ

¹ Kỹ tóg êg mỹ vênh pãte fón mũ sir, êg tỹ Jesus Cristo ki ge kỹ nỹtĩn kỹ. Kỹ êg tóg jatun mỹ nỹtĩ, Topẽ tỹ êg to jũ mãn tũ nĩn kỹ, êg Senhor tỹ Jesus Cristo tugrĩn.

² Ti hã tugnĩn Topẽ tóg êg jagãgtãn tĩ. Tag tugrĩn êg tar nỹtĩ sir. Kỹ tóg êg mỹ sér tĩ gé. Topẽ vĩ êg tỹ ãn mág han ke mũ, ti tỹ tỹ ãn mág nĩ ên ri ke han jé tóg ke mũ, kỹ tóg êg mỹ sér tĩnh mũ sir.

³ Ver êg tóg ti jagy vég tĩ, tag ki. Hã ra tóg êg mỹ sér tĩ gé, êg tỹ ti jagy vég mũ ra. Êg tỹ ti jagy vég mũ tag ne êg tar han ke mũ', komêr hã.

⁴ Êg tar nỹtĩn kỹ êg ti tovãnh sór tũ nĩ ki kanhró nỹtĩ sir. Êg tỹ ti tovãnh sór tũ nỹtĩn kỹ êg tóg Topẽ tỹ êg mỹ nén tó ja kar venh ke mũ, ti tỹ êg mỹ nén ã há ven ke ên ti, tá.

⁵ Êg pi(jé) venh ke tũ nĩ', Topẽ tỹ nén tó ja ên ti. Êg mỹ tóg ã kuprĩg jênê huri, ti tỹ tỹ êg jagrê nĩ jé. Êg jagrê tag vĩ êg mỹ: “Topẽ vĩ ã to há nĩ,” he tĩ. Ti hã tugrĩn êg ki kanhró nỹtĩ, êg tỹ Topẽ tỹ êg mỹ nén tó ja ên venh ke ki.

⁶ Jykre pãno êg nỹtĩ, krój êg nỹtĩ. Êg tỹ ver kórég nỹtĩ ên kã Cristo ne êg jagfỹ ter ja nĩgtĩ'.

⁷ Ti jãvo êg kã ã tóg êg jagfỹ ter ke tũ nĩ. ãn jykre há jagfỹ ter ke tũ êg nỹtĩ.

⁸ Ëg jāvo Cristo vỹ ãg jagfy ter ja nĩ, ãg tỹ tỹ Topẽ vỹ mranh jafã nỹtĩ ra. Hã ki ãg ki kanhró nỹtĩ, Topẽ tỹ ãg to há tãvĩ nĩ ti.

⁹ Kỹ Topẽ tóg ãg mỹ vãnh pãte fón mũ sir, Jesus tỹ ãg jagfy ter ja tugnĩn, ti kyvãnh tugrĩn. Kỹ tóg Topẽ tỹ vãnh kar to jũnh ke kurã ãn ki ãg kren han ke mũ gé, ha mẽ.

¹⁰ Ëg tỹ ver ti kato tẽ nỹtĩ ra Topẽ kósin tóg ãg jagfy ter, kỹ Topẽ tóg ãg to há nĩ, ãg to jũ mãn tũ ti nĩ. Kỹ tóg ãg to há nĩ ha. Kỹ tóg kurã ãn kã ãg kren han ke mũ gé, ti rĩr jẽn kỹ, ti kósin ti.

¹¹ Kurã ãn kã tóg ãg kren han ke mũ, hã ra tóg ũri ãg to há nĩ gé, kỹ tóg ãg mỹ sér tĩ. Ëg Senhor tỹ Jesus Cristo tugnĩn ke vẽ. Ti hã ne Topẽ tỹ ãg to há nĩnh ke han'. Ti hã ne Topẽ tỹ ãg to jũ tỹ tũ' he mũ'.

Adão vỹ Topẽ vỹ mranh vén, Jesus vỹ ki króm kãn

¹² Ha vé, ũn pir vỹ Topẽ vỹ mranh vén, kỹ Topẽ vỹ mranh vỹ kã nĩ nĩ sir. Ti vỹ mranh tugrĩn tóg ter ja nĩ gé, ũ tỹ ti vỹ mranh vén mũ ãn ti. Ũ tỹ ti vỹ mranh vén ja ãn ri ke ãg nỹtĩ, Topẽ vỹ mranh kãn ja ãg tóg nĩ gé, ãg tỹ tỹ ũn ve nón ke nỹtĩn kỹ. Kỹ ãg tóg kãgter kãn ke mũ gé, Topẽ vỹ mranh kỹ.

¹³ Topẽ tỹ ãg jyvẽn to hã ag tóg ti vỹ mranh ja nĩgtĩ gé, hã ra ag tóg vãnh jykre kórég to: “Topẽ vỹ mranh vẽ,” he ja tũ nĩ ver, ag tỹ Topẽ tỹ ãg jyvẽn tĩ ãn mẽ ja tũ nĩn kỹ, Moisés tỹ Topẽ vỹ rán ja to hã.

¹⁴⁻¹⁵ Ge ra ag tóg kãgter ja nĩ, ãn to. Adão vỹ ter, ti nón ke ag vỹ kãgter, Moisés mur to hã. Adão ne Topẽ tỹ ti mỹ ka kanẽ to: “ko tũg nĩ,” he ja ãn ko ja nĩgtĩ'. Ti nón ke ag vỹ Topẽ vỹ mranh gé, hã ra ag pi(jé) Adão tỹ Topẽ vỹ mranh ja ãn ri ke hyn han ja

nĩgtĩ'. Ge ra ag tóg kãgter. Kĩ ěg ũri kãgter tĩ gé, ěg tỹ ũn ve ěn nón Topě vĩ mranh kỹ.

Ũn pir tỹ Topě vĩ mranh vén ja tugrĩn ěg tóg kãgter kãn ke mũ. Ũn ve tỹ ěg jo vėnh jykre kórég han jan hã vė. Ti jãvo ti nón ke ěn ti, Jesus hã vỹ ěg mũ vėnh jykre há nĩm ke mũ. Ti tugnĩn Topě vỹ ũn e tãvĩ jagãtãn ke mũ sir. Ěg mũ tóg nén tỹ hėn ri ke hyn han ke mũ sir, kỹ tóg presente há tãvĩ ri ke nĩ sir, ũn pir tugrĩn, hã vỹ: Jesus Cristo, he mũ. Kỹ Jesus tỹ ěg mũ vėnh jykre há nĩm mũ ěn vỹ ũn ve tỹ ěg mũ vėnh jykre kórég nĩm ja ěn kãfór nĩ.

¹⁶ Ũn pir tỹ Topě vĩ mranh vén ěn tugnĩn ěg kãgter kãn ke mũ. Topě vĩ mranh pir tugrĩn tóg ěg vóg kónãn kãn ke mũ. Hã ra tóg ěg mũ presente ri ke han sór mũ ha. Ěg jagãgtãn tóg tĩ, ěg tỹ ti vĩ mranh tỹ hėn ri ke han ja ra, kỹ tóg ěg mũ vėnh pãte fón mũ gé sir.

¹⁷ Ũn pir tỹ Tope vĩ mranh vén ja tugnĩn ěg kar kãgter kãn ke mũ. Hã ra tóg ũn pir ũ tugrĩn ěg jagãgtãn ke mũ ha, kỹ tóg ěg mũ vėnh pãte fón mũ. Kỹ tóg ěg kugrynh ke mũ. Ěg mũ presente ri ke han hã vė. Kỹ ěg tóg rĩnrĩr mãn ke mũ gé, kỹ ěg tóg tá tỹ ũn mág nỹtĩnh mũ sir, ũn pir tugnĩn, hã vỹ: Jesus Cristo, he mũ. Hã ki Jesus tỹ ěg mũ vėnh jykre há nĩm mũ tóg ũn ve tỹ ěg mũ vėnh jykre kórég nĩm ja ěn kãfór nĩ.

¹⁸ Hỹ, ũn pir tỹ Topě vĩ mranh vén ja tugrĩn Topě tóg ěg vóg kónãn kãn ke mũ sir. Ri ke ti nĩ, Jesus tỹ ěg kren han mũ ti. Ũn pir tỹ Topě vĩ ki króm kãn tugnĩn Topě tóg ěg kar jagãgtãn ke mũ sir, kỹ tóg ěg mũ vėnh pãte fón ke mũ, ěg kãgter mãn tũ nĩ jé, ěg kuprĩg ti.

19 Ûn pir tóg Topě vĭ han ja tũ nĭ, kŷ ěg kar vŷ Topě vĭ mranh tĭ sir, ti nón. Kar kŷ ùn pir vŷ Topě vĭ han kân ja nĭgtĭ, kŷ Topě tóg ti tigrĭn ěg mŷ vĕnh pãte fón kân ke mũ gé sir.

20 Kŷ Topě tóg Moisés tŷ ěg jyvĕn ja nĭgtĭ, hã kŷ tóg rán ja nĭ. Kŷ ěg tóg ti vĭ mẽ kŷ ěg tŷ Topě vĭ mranh e han ja ěn ki kanhrãn mũ sir. Ěg tŷ ti vĭ mranh e tãvĭ nĭ ra Topě tóg ěg jagãgtãn kãfór han mũ gé sir,

21 ti tŷ ěg jykre kugrynh jé sir. Nũgme ki ěg tóg vár kân ke mũ vĕ, inferno ki, ěg tŷ Topě vĭ mranh to. Jagy ti nĭ. Hã ra Topě tóg ěg jagãgtãn kân ke mũ, kŷ tóg ěg kugrynh ke mũ, kŷ ěg rĭr krŷg ja tũ venh ke mũ, nũgme ki vár ke tũ ěg nŷtĭ, inferno ki. Topě tŷ ěg jagãgtãn hã vĕ, ěg Senhor tŷ Jesus Cristo tŷ ěg jagŷy ter ja tigrĭn ken hã vĕ.

6

Jesus Cristo tŷ ěg jykre si tũg

1 Kŷ Judeu ù hŷn inh mŷ: “kŷn hŷn há nĭnh mũ, ěg tŷ Topě vĭ mranh kŷ,” he sór mũ. “Kŷ tóg ěg jagãgtãn kãfór han ke mũ gé, ěg tŷ mranh mág kŷ,” he sór ag hŷn mũ.

2 Vó, há tũ pĕ ti nĭ. Kórég ti nĭ. Ti ki ge kŷ ěg tóg vĕnh jykre tãg han tĭ, kŷ ěg jykre si tóg tũ tĭ ha, ti tŷ ěg jykre si tŷ tũ' hen kŷ.

3 Ha vé, vĕnh kype kŷ ěg nŷtĭ. Batismo tag vŷ ge nĭ, ha mẽ. Ěg tŷ Cristo ki rã to ken hã vĕ. Cristo vŷ ter ja nĭ. Ter kŷ tóg ěg jykre si tŷ tũ' hé.

4 Tũg kŷ tóg ti mré vĕnh kej kãkã nŷ ri ke han mũ gé, ěg jykre si ti. Kŷ Cristo vŷ rĭr mãn, ter kar kŷ, Topě tŷ ti rĭn mãn kŷ. Tar ti nĭ, Topě ti, hã kŷ tóg ti

rĩn mǎn. Ęg tỹ ti mré rĩr mǎn ri ke ti nĩ, hǎ vỹ: vĕnh jykre tǎg to tar nĩ, he mũ. Batismo to ken hǎ vĕ.

⁵ Ęg jykre si tỹ tóg tũ' hé, ti ter kỹ, kỹ Ęg jykre tǎg tóg nỹ ha, Ęg tỹ ti mré rĩnrĩr nỹtĩn kỹ, ti rĩr mǎn ěn ri ke.

⁶ Ti tỹ cruz to sa kỹ Ęg jykre si tóg ti mré to sa ri ke han gé, kỹ tóg tũ' he mũ, Ęg tỹ ti vĩ mranh mǎn tũ nĩ jé. Topĕ vĩ mranh jafǎ vỹ tỹ Ęg nỹtĩ ja nĩgtĩ, hǎ kỹ tóg tỹ tũg' he ja nĩ, Jesus Cristo ti. Hǎ kỹ Ęg tóg ũri Topĕ vĩ mranh tĩ ag ri ke tũ nỹtĩ ha.

⁷ Ęg jykre si tũg kỹ Ęg tóg jykre kuryj nỹtĩ ha, ha mĕ, kỹ Ęg tóg mranh sór mǎn tũ nĩ ha.

⁸ Cristo vỹ Ęg jykre si tỹ tũg' hé, ti ter kỹ. Kỹ tóg Ęg mỹ vĕnh jykre tǎg han mũ gé, rĩr mǎn kỹ, kỹ Ęg tóg ti mré jykre tǎg ěn hǎ mĩ mũnh mũ. Vĕnh vĩ há to ken hǎ vĕ.

⁹ Cristo ne rĩr mǎn', ter kar kỹ. Kỹ tóg ter mǎn ke tũ nĩ ha. Ũ vỹ ti tén mǎn ke tũ pĕ nĩ ha.

¹⁰ Ter ja ti nĩ. Ti ter ja vỹ pir nĩ, Ęg tỹ Topĕ vĩ mranh ěn tugnĩn. Kỹ tóg rĩr jĕ nĩ sir, Topĕ mỹ, ti tỹ Topĕ tũ han kǎn jé.

¹¹ Kỹ ti ri ke han nĩ. Topĕ vĩ mranh tũg nĩ, ājag jykre si ter kỹ nỹn kỹ. Topĕ jykre hǎ han nĩ, ājag tỹ ti tũ han kǎn jé, ājag tỹ Jesus Cristo ki ge kỹ nỹtĩn kỹ.

¹² Ęg jykre vỹ Topĕ vĩ mranh sór mũ, Ęg jykre ter ke tag. Ęg jykre tỹ nén to én mũ ěn han tũg nĩ, Topĕ vĩ mranh tũg nĩ.

¹³ Kejĕn ājag tóg ājag pĕn tỹ, ājag nĩgé tỹ, ājag nũnĕ tỹ, ājag há ki nỹtĩ kar tỹ Topĕ vĩ mranh sór mũ. ājag tỹ mranh kỹ ājag tóg ājag há tỹ vĕnh jykre pǎno han ja nỹtĩgtĩ, Topĕ kato tĕ ja nỹtĩgtĩ. Kỹ ke tũg nĩ. Topĕ

mỹ vênh fêg nĩ. Ājag jykre si ter kỹ, ājag jykre tãg nýtĩn kỹ Topê mỹ vênh fêg kãn nĩ, ti jykre hã han sórmnĩ, ājag jykre tỹ, ājag há ki nýtĩ kar tỹ. Ēg tỹ ti mỹ vênh fêg kỹ ěg tóg ti jykre há han kãn ke mũ sir.

¹⁴ Kỹ ěg tóg ũri Topê vĩ mranh tĩ ag ri ke tũ nýtĩ ha, Topê tỹ ěg jagãgtãn kỹ, ti tỹ ěg tar han kỹ. Ti tỹ ěg jyvẽn ja ěn tugnĩn tóg ěg vóg kónãn ke mũ vê, ěg tỹ mranh kỹ, hã ra tóg ěg jagãgtãn mũ ha.

Jesus Cristo tỹ ěg jykre tãg

¹⁵ Kỹ Judeu ag hỹn inh mỹ: “kỹ Topê vĩ ěg tỹ ti vĩ mranh mũ ra ěg vóg kónãn mãn ke tũ nĩ. Kỹ ěg hỹn jatun mỹ mranh mũ,” he sór mũ. “Ēg jagãgtãn ti tĩ, hã kỹ tóg tỹ nén ũ tũ nĩ, ti vĩ mranh mũ ti,” he sór ag hỹn mũ. Hã tũ vê hã ra. Kórég ti nĩ, ěg tỹ ti vĩ mranh kỹ.

¹⁶ Ēg tỹ ũ mỹ vênh fêg kỹ tóg tỹ ěg patrão nĩ, kỹ ěg hã vĩ tỹ ti camarada nýtĩ. Ri ke ti nĩ, ěg tỹ Topê vĩ mranh sór kỹ. Ti vĩ mranh jafã vĩ tỹ ěg nýtĩ, ěn kã. Ēg tỹ Topê vĩ kri fig tĩ nĩn kỹ ěg tóg ti mỹ há nýtĩ sir.

¹⁷ Vãsỹ ājag tóg tỹ Topê vĩ mranh jafã ja nýtĩgtĩ. Hã ra ājag tóg ũri Topê vĩ kri fig tĩ ha, ājag fe tỹ ti ki ge kỹ. Ājag tỹ Topê vĩ mẽ ja ěn kri fig ājag tóg tĩ, kỹ sóg Topê mỹ vĩ há han tĩ, ājag to.

¹⁸ Topê vĩ ājag jykre kugrynh, ājag tỹ tỹ ti vĩ mranh jafã tũ nýtĩ jé, ũri. Kỹ ājag tóg tỹ Topê krêm ke nýtĩ, ājag tỹ tỹ ti jykre kuryj mũ mũ jafã nýtĩ jé, ũri.

¹⁹ Ājag mỹ sóg ěg tỹ tỹ ti vĩ ki króm jafã nýtĩ tag tó mũ, comparação han kỹ, ājag tỹ to ěg tỹ tỹ ũn há mỹ vênh fêg ki kanhró nýtĩ jé, hã vĩ: Topê, he mũ. Vãsỹ ājag tóg vênh jykre pãno han sór ja nýtĩ, nén ũ kavéj

ti, nén ũ kórég kar ti. Tag han kÿ ãjag tóg ũn kórég mÿ vënh fëg ja nÿtĩ. Ũri Topë mÿ vënh fëg kãn, ãjag tÿ tÿ ti tũ nÿtĩ jé, vënh jykre kuryj hã han jé sir.

²⁰ Vãsÿ, ãjag tÿ tÿ Topë vĩ mranh kÿ nÿtĩn kÿ vënh jykre há tóg ãjag mÿ tũg ja nĩ.

²¹ Kÿ ãjag ne han ja nÿtĩ, tempo ên kã? Vënh jykre kórég tävĩ han ja ãjag tóg nÿtĩ. Æjag tÿ ãjag jykre si to jykrén kÿ tóg ãjag mÿ'a tĩ, ũri. Vënh jykre tag tugnĩn êg nũgme ki vár kãn ke mũ vë, hã kÿ tóg ãjag mÿ'a tĩ, ãjag tÿ ti kórég han ja to jykrén kÿ.

²² Ũri ãjag tóg kygvar kÿ nÿtĩ, mÿr, ha mẽ, Topë vĩ mranh ja ên tÿ tóg tũg' he ja nĩ. Topë mÿ ãjag vënh fëg kÿ nÿtĩ. Æjag tÿ nén han mũ vÿ tÿ ti tũ nĩ, ti jykre kuryj, kÿ ãjag tóg ter ke tũ nĩ ha, ãjag kuprĩg vÿ rĩr nĩ ha.

²³ Topë vĩ mranh tigrĩn êg nũgme ki vár ke mũ vë. Topë tÿ êg vóg kónãn hã vë. Hã ra tóg êg jagãgtãn mũ, kÿ tóg êg mÿ rĩr krÿg ja tũ ven ke mũ. Ti tÿ êg mÿ presente han hã vë, hã vÿ: êg tÿ êg rĩr krÿg ja tũ venh ke, he mũ, êg Senhor tÿ Jesus Cristo tugnĩn.

7

Vënh prũg to comparação

¹ Inh kanhkã', Topë tÿ vãsÿ êg mÿ vënh jykre nĩm ja ên ki kanhró ãjag tóg nÿtĩ, Moisés tÿ rán ja ên ti. Êg rĩr nÿtĩn kÿ êg tóg vënh jykre ên han kÿ nÿtĩ, êg ter kÿ tóg êg mÿ tũ' he mũ, vënh jykre ên ti.

² Rĩ ke ti nĩ gé, êg prũ fi mré. Fi mén rĩr jën kÿ fi tóg tÿ ti tũ jë, fi mén tũ. Ti ter kÿ fi tóg tÿ ti tũ tũ jë sir, ti tũg kÿ.

³ Fi mén rĩr jën kÿ fi tóg tÿ ti tũ jë. Fi tÿ ti rĩr tũ ra ũ mré nÿ kÿ fi tóg ã mén tũ mré nÿ mũ. Ti ter kÿ fi

tóg mén tũ jě sir, kŷ, fi tŷ ũ mré tŷg sór kŷ tóg sir há tĩ, fi mén vĕ sir, fi tŷ ũ mré tĩ mũ ěn ti.

⁴ Ri ke ti nĩ, Topĕ tŷ vāsŷ ěg mŷ vĕnh jykre nĩm ja ěn ti. Cristo ter kŷ tóg ěg jykre si tŷ tũg' hé gé. Hã kŷ tóg ěg tŷ ti tŷ ěg jyvĕn ja ěn mranh ja ra tóg ěg vóg kónãn ke tũ nĩ sir. Vãhã ěg tóg tŷ Cristo tũ nŷtĩ ha, ũ tŷ ter kar kŷ rĩr mãn ja ěn tũ vŷ tŷ ěg nŷtĩ. Kŷ ěg tóg ũri Topĕ jykre hã han sór mũ ha, ti mŷ sér tĩ jé.

⁵ Vāsŷ ěg tóg ěg tŷ nĕn to ěn ja ěn hyn han tĩ ja nĩgtĩ. Kŷ ěg tóg vĕnh jykre kavĕj han kãn ja nĩgtĩ, ěg jykre tŷ, ěg há ki nŷtĩ kar tŷ ke gé. Ěg jykre kavĕj tigrĩn ěg nũgme ki vár ke mũ vĕ. Topĕ tŷ ěg jyvĕn mũ jĕmĕn kŷ ěg tóg ki kanhrãn mũ, ěg tŷ ti vĩ mranh mũ tag ki. Jérĩn mŷ ěg tóg mranh mãn', mranh mãn' he mũ sir.

⁶ Hã ra tóg ěg mŷ tũ tĩ ha, ěg tŷ Topĕ tŷ vāsŷ ěg jyvĕn jĕmĕg mũ ra mranh mũ ti, Cristo tŷ ter kŷ ěg jykre si tŷ tũg' hen kŷ. Topĕ vĩ mranh sór tũ ěg nŷtĩ ha. Ěg kygvãn ti huri, kŷ ěg tóg Topĕ tũ hã han tĩ sir, Topĕ kuprĩg tŷ ěg krĩn kŷ. Kŷ ěg tóg Topĕ tŷ ěg jyvĕn to kanĕ jur han mãn ke tũ nĩ ha. Ki króm sór ěg nŷtĩ ha. Ěg kanĕ jur pijé'. Topĕ kuprĩg tŷ ěg mŷ vĕnh jykre tãg nĩm jan hã vĕ.

Vĕnh jykre kórég han kŷ ěg Topĕ vĩ mranh tĩ

⁷ Kŷ Judeu ag hŷn inh mŷ: “kŷ Topĕ tŷ vāsŷ ěg jyvĕn mũ ěn mŷ kórég nĩ?” he sór mũ. Vó, kórég tũ ti nĩ. Ěg jyvĕn ja tóg nĩgtĩ, kŷ ěg tóg ti vĩ mĕ kŷ: “vĕnh jykre kórég han kŷ inh hŷn tóg ti vĩ mranh tĩ,” he tĩ. Topĕ vŷ ěg mŷ: “nĕn ũ to ěn tũg nĩ,” he ja nĩ. Tag jĕmĕn kŷ ěg tóg ũ tũ to ěn tag tŷ Topĕ vĩ mranh nĩ ki kanhró nŷtĩ.

⁸ Topě tỹ ěg jyvĕn mũ ra ěg tóg ti vĩ mranh sór mũgtĩ, jérĩn mỹ. Ti tỹ ěg mỹ: “tag han tũg ra,” he mũ ra ěg tóg han sór tĩ, hã kỹ ěg tóg ũ tũ to én sór tĩ. Topě tỹ ěg jyvĕn tũ ra ěg ki kanhrãn ke tũ nĩ vĕ, vĕnh jykre pãno tỹ ti vĩ mranh nĩn ki.

⁹ Vãsỹ ěg tóg Topě tỹ ěg jyvĕn mũ ěn mĕg tũ ja nỹtĩgtĩ. Véké ěg tóg mũ ja nỹtĩgtĩ, jatun mỹ. Kỹ tóg vãhã ěg mỹ ã vĩ jĕnĕ ja nĩ, Topě ti, ěg jyvĕn kỹ. Ěn mĕ kỹ ěg tóg ěg tỹ ti vĩ mranh ja ěn ki kanhrãn ja nỹtĩgtĩ, ěg tỹ to nũgme ki vár ke mũ mré hã. Kỹ ěg tóg kanĕ jur nỹtĩ ha.

¹⁰ Topě vỹ tóg ěg jyvĕn, ěg tỹ nũgme ki vár ke tũ nỹtĩ jé. Jérĩn mỹ ěg tóg ki vár ke mũ, ěg tỹ ti tỹ ěg jyvĕn kri fig tũ nĩn kỹ. Hã ve ěg tóg, ěg tỹ ti tỹ ěg jyvĕn mĕ kỹ.

¹¹ Ěg tỹ Topě vĩ mranh kỹ ěg tóg Topě tỹ ěg jyvĕn mũ kato tĕ mũ. Kỹ ěg nũgme ki vár ke mũ sir, ěg tỹ: “ti hỹn tỹ nĕn ũ tũ nĩ, sỹ ti vĩ mranh mũ ti,” he mũ ra.

¹² Hã kỹ Topě tỹ vãsỹ ěg jyvĕn mũ ěn vỹ há nĩ, ti tỹ tỹ Topě tũ nĩn kỹ. Kỹ Topě tỹ vãsỹ ěg mỹ vĕnh jykre nĩm ja ěn vỹ kuryj nĩ gé. Há ti nĩ, Topě tũ vỹ tỹ ti nĩ gé.

¹³ Kỹ Judeu ag hỹn inh mỹ: “ěg mỹ vĕnh jykre há tugnĩn nũgme ki vár ke mũ?” he sór mũ. Vó, ke tũ vĕ. Topě vĩ mranh tugrĩn ěg nũgme ki vár ke mũ. Nĕn ũ há ja vĕ, Topě tỹ ěg jyvĕn ja ti, hã ra ěg tóg mranh. Ěg tỹ Topě tỹ ěg jyvĕn mĕ kỹ ěg tóg ěg jykre kórég to: “ti vĩ mranh ja inh nĩgtĩ,” he tĩ. Hã ki ěg tóg ki kanhrãn mũ, ěg tỹ Topě vĩ mranh tag tỹ tỹ nĕn ũ kórég tãvĩ nĩn ki.

¹⁴ Topě tỹ ěg jyvĕn mũ ěn vỹ tỹ ti tũ nĩ, ti kuprĩg

vỹ to ãg kanhrãn tĩ. Jẽrĩn mỹ ãg tóg ãg tỹ nén to én mũ ãn han sór tĩ, ãg krój nỹtĩn kỹ. Ti vĩ mranh kỹ ãg tóg tỹ ti vĩ mranh jafã nỹtĩ.

Ãg tỹ ti kórég han sór tũ ra ãg tóg han tĩ

¹⁵ ãg jykre tóg inh mỹ e tĩ. Sỹ nén to há ãn han tũ sóg nỹgtĩ. Sỹ nén to há tũ ãn hã han sóg tĩ mỹr, kỹ tóg inh mỹ e tĩ.

¹⁶ ãg tỹ ti kórég han sór tũ ra ãg tóg han tĩ. Ti vĩ mranh mũ vĩ ãg mỹ kórég nĩ, kỹ ãg tóg ki kanhró nỹtĩ, ti tỹ ãg jyvẽn há han ja ãn ki. Ge ra ãg tóg mranh tĩ.

¹⁷ ãg jykre si hã vễ. ãg tỹ ãg jykre si tovãnh kãn ja tũ nĩn kỹ ãg tóg ti vĩ mranh tĩ, ãg tỹ mranh sór tũ (hã) ra. ãg jykre tãg tũ vễ, tag ti.

¹⁸ ãg pi(jé) vễnh jykre há to tar nỹtĩ'. Vễnh jykre kórég vĩ ver ãg kãkã nĩ nĩ. Vễnh jykre kuryj tóg ãg mỹ sér tĩ, ge ra ãg tóg ti pãno han tĩ, ãg tỹ ãn há han sór mũ ra.

¹⁹ Hã kỹ ãg pi(jé) vễnh jykre há han tĩ', ãg tỹ han sór mũ ra'. Ti kórég hã han ãg tĩ, ãg tỹ han sór tũ ra.

²⁰ ãg tỹ nén han sór tũ ãn han ãg tóg tĩ, vễnh vatánh tá. ãg jykre si hã tugrĩn ãg tóg Topẽ vĩ mranh tĩ, ãg tỹ tovãnh kãn ja tũ nĩn kỹ.

²¹ Ha vé, ãg jykre ti. ãn há hã han sór ãg tóg mũgtĩ. Ge ra ãg tóg ãn kórég hã han tĩ, ãg jykre si tỹ ãg kãkã nĩn kỹ.

²² ãg tỹ to jykrén há han kỹ ãg tóg: “Topẽ tỹ ãg jyvẽn mũ vĩ há nĩ,” he ti. ãg mỹ tóg sér tĩ.

²³ ãg tỹ hã ra ãg jykre to jykrén kỹ ãg tóg vễnh jykre kórég hã han mũgtĩ ver, vễnh vatánh tá. Kỹ ãg tóg sir vễnh jykre há kato tễ mũ, ãg tỹ vễnh jykre

kórég han kÿ, vĕnh jykre há tÿ ěg mÿ há nĭ (hã) ra. Ti vĭ mranh jafã vÿ tÿ ěg nÿtĭ, ěg tÿ Topĕ vĭ mranh to ěn kÿ, ěg tÿ to ěn sór tũ ra. ěg kãkã tóg nĭ nĭ, vĕnh jykre kórég ti.

²⁴⁻²⁵ ěg tÿ to jykrĕn há han kÿ Topĕ tÿ ěg jyvĕn tĭ ěn tóg ěg mÿ há tĭ, kÿ ěg tóg han sór mũ. Ge ra ěg tóg ti vĭ mranh ja nĭgtĭ, kÿ ěg tóg mranh mãn', mranh mãn' he tĭ sir, ěg tÿ mranh sór tũ ra.

Jagy pĕ ti nĭ. Kórég ěg nÿtĭ, ěg tÿ ũn há han ki kagtĭg nÿtĭn kÿ. Nũgme ki vár kãn jé ěg tóg ke mũ mÿr. Ũ nÿ hÿn ěg kren han ki kanhró nĭ, vĕnh jykre kórég tag to? ěg Senhor tÿ Jesus Cristo hã vĕ. Ti hã vÿ ěg kren han mũ. Kÿ ěg tóg Topĕ mÿ: “há ti nĭ, ã kósin tÿ ěg kren han mũ ti,” he tĭ. Hã kÿ ěg tóg vĕsóg ki ěg jykre si tÿ tũg' he ki kagtĭg nÿtĭ. Jesus hã tugnĭn Topĕ tóg ěg mÿ vĕnh pãte fón tĭ, kÿ ěg tóg ti mÿ há nÿtĭ.

8

Topĕ kuprĭg tÿ ěg jagrĕ

¹ Kÿ tóg, ěg tÿ Jesus Cristo ki rã kÿ Topĕ tóg ěg vóg kónãn mãn ke tũ nĭ ha.

² Vĕnh jykre tãg vÿ ěg kãkã nĭ ha, Topĕ kuprĭg tugrĭn, ěg tÿ Jesus Cristo ki ge kÿ nÿtĭn kÿ. Ti tÿ tÿ ěg jagrĕ nĭn kÿ ěg rĭnrĭr nÿtĭ, kÿ ěg kygvar kÿ nÿtĭ sir, Topĕ vĭ mranh jan ki. Nũgme ki vár ke tũ ěg nÿtĭ ha.

³ Topĕ tÿ vãsÿ ěg jyvĕn mũ ra ěg krenkren ja tũ nĭ ver, ěg tÿ ki króm kãn ja tũ nĭn kÿ, ěg krónhkrój nÿtĭn kÿ. Hã kÿ Topĕ tóg ã kósin jĕnĕ ja nĭ. Ũ tÿ Topĕ vĭ mranh jafã ri ke tóg mur, ěg ri ke, hã ra tóg mranh ja tũ nĭ inhhã. Kÿ tóg ěg jagfy ter ja nĭ, ěg hã tÿ ti

vĩ mranh ja tugrĩn. Topẽ tỹ ti vóg kónãn hã vễ, ẽg nỹtĩg ja ki.

⁴ Vãhã ẽg tóg Topẽ tỹ vãsỹ ẽg jyvẽn mũ ẽn ki króm há nỹtĩ, Topẽ kuprĩg tỹ tỹ ẽg jagrẽ nĩn kỹ. Kỹ ẽg tóg ẽg tỹ nén to én mũ ẽn han mãn ke tũ nỹtĩ sir, ẽg jagrẽ há tỹ ẽg tar han mũ tugnĩn.

⁵ Ẽg tỹ ẽg tỹ nén to én mũ ẽn han sór kỹ ẽg tóg tỹ Topẽ vĩ mranh jafã nỹtĩ. Ẽg tỹ hã ra Topẽ kuprĩg tỹ jagrẽ nĩn kỹ ẽg tóg ti hã tỹ ẽg mỹ nén tó mũ ẽn han tĩ.

⁶ Ẽg tỹ nén to én mũ ẽn han kỹ ẽg nũgme ki vár ke mũ vễ. Ẽg tỹ Topẽ kuprĩg tỹ ẽg mỹ nén tó mũ ẽn han kỹ ẽg tóg vẽnh jykre tãg han kỹ nỹtĩ, kỹ ẽg jatun mỹ mũgtĩ sir.

⁷ Ủ tỹ ẽg tỹ nén to én mũ ẽn han kỹ tóg Topẽ kato tẽ mũ sir. Ti pi(jé) Topẽ jykre han tĩ'. Han ki kagtĩg tóg nĩgtĩ. Ẽg jykre sin hã vễ.

⁸ Ủ tỹ ẽg tỹ nén to én mũ ẽn han to tóg kórég nĩ, Topẽ ti.

⁹ Ag jãvo ãjag tóg Topẽ kuprĩg tỹ ãjag mỹ nén tó mũ ẽn hã han tĩ. Ẽg tỹ nén to én mũ ẽn han vãn hã ãjag nỹtĩ, Topẽ kuprĩg tỹ tỹ ãjag jagrẽ nĩn kỹ. Ủ tỹ Cristo kuprĩg tỹ jagrẽ tũ nĩ ẽn pi(jé) tỹ ti tũ nĩ'.

¹⁰ Cristo tũ vỹ tỹ ẽg nỹtĩ, kỹ tóg ẽg kãkã jẽ nĩ, Jesus Cristo ti, ã kuprĩg tỹ. Kỹ ẽg há vỹ ter ke mũ, ẽg tỹ Topẽ vĩ mranh jan kỹ. Hã ra ẽg tóg ẽg rĩr krỹg ja tũ venh ke mũ, Topẽ tỹ ẽg mỹ vẽn hã pãte fón ja nĩn kỹ.

¹¹ Topẽ kuprĩg vỹ tỹ ẽg jagrẽ jẽ ha. Topẽ vỹ Jesus rĩn mãn, ti ter kar kỹ. Ti tỹ Jesus rĩn mãn kỹ tóg ẽg há ter ke tag rĩn mãn ki kanhró nĩ gé, ẽg mỹ ẽg há tãg han kỹ, ti kuprĩg tỹ tỹ ẽg jagrẽ nĩn kỹ.

12 Inh kanhkā', Topē tũ vỹ tỹ ěg nỹtĩ ha, ěg tỹ ti jykre hã han jé. Kỹ han tũg nĩ, ãjag tỹ nén to én mũ ti.

13 ěg tỹ nén to én mũ ěn han kỹ ěg nũgme ki vár ke mũ. Topē tỹ ěg jagrē vỹ ěg tỹ nén to én mũ tag tỹ tũg' he sór mũ. ěg tỹ ti mré tỹ tũg' hen kỹ ěg vėnh jykre tag han kỹ nỹtĩnh mũ.

14 ěg tỹ Topē kuprĩg tỹ ěg mỹ nén tó tĩ ěn han kỹ ěg tóg tỹ Topē krē nỹtĩ, Jesus jãvy ěg nỹtĩ mỹr, ha mẽ.

15 ěg tỹ tỹ Jesus jãvy nỹtĩn kỹ ti pi(jé) ěg kanē jun ke mũ'. Ti kuprĩg vỹ tỹ ěg jagrē nĩ, kỹ ěg tóg tỹ Jesus jãvy nỹtĩ ha. Topē pi(jé) tỹ ěg patrão kórég ri ke nĩ'. Tỹ tóg ěg panh nĩ ha. Hã kỹ ěg tóg ti mỹ: “Aba,” he tĩ, hã vỹ: “ěg jóg,” he mũ, ěg vĩ ki. ěg jagrē hã jamėn kỹ ěg tóg ti mỹ: “ěg jóg mág,” he tĩ.

16 Topē kuprĩg hã ne ěg mỹ tó tĩ', ěg tỹ tỹ Topē krē nỹtĩ ti, Jesus jãvy. Hã kỹ ěg ki kanhró nỹtĩ.

17 ěg tỹ tỹ ti krē nỹtĩn kỹ tóg ěg mỹ ã tũ nĩm kãn ke mũ gé, Topē ti. Jesus Cristo hã mỹ tóg nĩm kãn ke mũ, kỹ tóg ěg mỹ nĩm kãn ke mũ gé sir, ěg kãke mré. Hã jé ěg tóg ti mré jagãgtar ke mũ gé, ti tỹ vėnh jykre há to jagtar ja ěn ri ke. Kỹ ěg tóg ti mré tỹ ùn mág nỹtĩnh ke mũ gé, ěg jagtar kar kỹ.

Kanhkã ve jé ěg tóg ke mũ

18 Ha vé, tag ki kanhró sóg nĩ, ha mẽ. Kanhkã tá tóg sér pē tĩnh mũ. Tá ěg tóg tỹ ùn mág nỹtĩnh mũ. Kỹ ěg tỹ ùri ti tugnĩn jagãgtar mũ tag vỹ tỹ ěg mỹ nén ù tũ pē nĩgtĩ, ěg tỹ tỹ ùn mág nĩnh ke to jykren kỹ.

19 Topē vỹ ã krē tỹ tỹ ùn mág han ke mũ. Kỹ Topē tỹ ùn han mũ kar ag tóg tag hã ve sór mũ gé, bicho kar, ka kar, ěkré kar ke gé, nén kar ti.

²⁰ Nén kar vỹ jagãgtar nỹtĩ, ùn ve tỹ Topẽ vỹ mranh tugrĩn. Vẽnh kókén ja tũ ti nĩ, Topẽ vỹ mranh ja tũ ti nĩ, hã ra tóg ùn ve tỹ Topẽ vỹ mranh ja tugnĩn jagtar nỹtĩ, Topẽ tỹ ẽg mré ti vóg kónãn kỹ, nén kar ti.

²¹ Hã ra Topẽ tóg ã tỹ ùn han mũ kar ag mỹ: “kejẽn ãjag jagtar mãn ke tũ nỹtĩ ha,” he ja nĩ. Kỹ Topẽ tỹ Jesus jãvy ag tỹ ùn mág hyn han ke kurã ẽn kã tóg nén kar tỹ há' henh ke mũ gé, kỹ tóg tũg mãn ke tũ nĩ ha, nén kar ti. Nén kar vỹ há nỹtĩnh mũ, Jesus jãvy há nỹtĩnh ke ẽn ri ke.

²² Ver tóg Topẽ tỹ ùn han mũ kar ag mỹ jagy tĩ, kỹ tóg fag tỹ fag kósın mãn kỹ fag vẽnhrẽr ẽn ri ke han tĩ, Topẽ tỹ ùn han kar ti, ti jagãgtar nỹtĩn kỹ.

²³ Nén ù kar tag vẽnhrẽr ri ke han ẽg tóg tĩ gé, ẽg tỹ ti jagy ven kỹ, ẽg tỹ ti kuprĩg tỹ jagre nỹtĩ ra. Ẽg jagrẽ to ẽg tóg ki kanhró nỹtĩ, ẽg tỹ tá tỹ ùn mág nỹtĩnh ke ti. Ge ra tóg ver ẽg mỹ jagy tĩ, tag ti ki, kỹ ẽg tóg ti mré nỹtĩ sór mũ. Kỹ ẽg tóg venh ke mũ sir, ti tỹ ã krẽ pẽ mỹ nén nĩm ke mũ ẽn ti. Hã jãvãnh ẽg tóg mũ. Ẽn kã tóg ẽg mỹ ẽg fár tãg han ke mũ, ẽg fár ter ke tũ ti.

²⁴ Krenkren kỹ ẽg nỹtĩ, hã ra ẽg tóg ver vég tũ nĩgtĩ, ẽg krenkren kỹ nỹtĩ tag, ẽg fár tãg tag. Ẽg tỹ venh há tóg tĩ. Hã jãvãnh ẽg tóg tĩ. Ẽg tỹn jãvãnh mũ ra ẽg tóg ver vég tũ nỹtĩ. Ẽg tỹn ve kar kỹ ẽg tóg ti jãvãnh mãn ke tũ nỹtĩ ha.

²⁵ Hã ra ẽg tóg ver vég tũ nỹtĩ, hã kỹ ẽg tóg ti jãvãnh mũ ver. To krónh ke tũ ẽg tóg nỹtĩ, ti jãvãnh to.

Topẽ kuprĩg tỹ ẽg jagfy vỹ

26 Hã ra Topẽ kuprĩg vỹ ãg tar han tĩ, ãg krój nỹtĩn kỹ. Kejẽn ãg ki kagtĩg nỹtĩ, ãg tỹ ne to vĩnh ken ki, ãg tỹ Topẽ mré vēmén kỹ. Hã kỹ tóg ãg jagfy vỹ tĩ, Topẽ kuprĩg ti. Kejẽn ãg jẽnger mág han tĩ, ãg tỹ nén ù to vĩnh ken ki kagtĩg nỹtĩn kỹ. Hã ra tóg ãg mré vỹ tĩ gé, ãg jagfy, Topẽ kuprĩg ti. Ti vỹ ki kagtĩg ãg nỹtĩ, hã ra tóg ãg jagfy vỹ' vỹ' he tĩ.

27 Kỹ Topẽ vỹ ãg tỹ nén ù to jykrén mũ kar vég tĩ. Kỹ tóg ã kuprĩg tỹ nén tó mũ tag ki kanhró nĩ gé. Ti jykre vỹ ti mỹ há nĩ, ti tỹ nén to vỹ mũ ti, ãg jagfy, Topẽ tũ kar ag jagfy. Topẽ tỹ nén ù han sór mũ ẽn hã to vỹ tóg tĩ, ti kuprĩg ti.

28 Ha vé, Topẽ to há ãg nỹtĩ, hã kỹ ãg tỹ nén vég mũ kar vỹ ãg tar han ke mũ, ãg tỹ ti jagy vég mũ mré hã. Topẽ hã vỹ ãg ki rĩr mũ, hã kỹ nén ù kar vỹ ãg tar han ke mũ, ti tỹ ãg kuprẽg ja nĩn kỹ.

29 ãg tỹ ti ki ge tũg ki tóg: “inh ki tóg rãnh ke mũ, tag,” he ja nĩ, ki kanhró nĩn kỹ. Kỹ tóg ãg kuprẽg ja nĩ gé, ãg tỹ ti kósin ri ke pẽ nỹtĩ jé. Ti hã vỹ tỹ Topẽ kósin pẽ nĩ inhhã, ti kósin ve, kỹ tóg tỹ ãg kãke nĩ gé sir, kỹ ti jãvy ag, ti ve fag vỹ e tãvĩ tãvĩ nỹtĩnh mũ ha. ãg hã vỹ sir. Topẽ tỹ nén to jykrén hã vỹ.

30 Hã jé tóg ãg kuprẽg, kỹ tóg ãg mỹ vẽn h vỹ jẽnẽ. Ti tỹ ãg mỹ vẽn h vỹ jẽnẽ kỹ tóg ãg mỹ vẽn h pãte fón gé. ãg mỹ vẽn h pãte fón kỹ tóg ãg tỹ ùn mág hyn han ke mũ gé, ti mré, tá.

Topẽ tỹ ãg to há

31 Tag tóg inh mỹ e tĩ, sỹ to jykrén ke tóg inh mỹ tũ tĩ. Topẽ vỹ tỹ ãg mré ke nĩ mỹr. Hã kỹ ãg kato tẽ ù pi(jé) ãg tỹ hẽ ri kenh mũ ha'.

³² Topê vỹ ã kósin pir fêg ja nĩ, ti tỹ êg jagfy ter jé. Æ kósin pir nenh ja tũ tóg nĩ, hã kỹ tóg êg mỹ nén ù há nenh ke tũ pẽ nĩ, ti tỹ ã kósin pir nenh ja tũ nĩn kỹ.

³³ Topê tỹ êg kuprêg kỹ tóg ù tỹ êg kato vỹ sór mũ ra tóg ag mỹ vẽnhmỹ tĩ. Topê hã ne êg mỹ vẽn pãte fón ja nĩgtĩ'.

³⁴ Kỹ ù ag tỹ êg to: “kórég ag nỹtĩ,” he mũ ra êg tóg Topê mỹ há nỹtĩ. Jesus Cristo hã tóg ter ja nĩ, êg jagfy, kỹ tóg rĩr mãn ja nĩ gé. Topê pêgja tá tóg nĩ nĩ, ti rã hã, kỹ tóg êg jagfy vỹ tĩ.

³⁵ Kỹ ù pi(jé) Cristo tỹ êg to jũ han ki kanhró nĩ'. Ti fe vỹ tỹ êg nỹtĩ. Kejẽn êg tóg nén ù jagy venh ke mũ, ti tugrĩn. Kejẽn êg kanẽ jur ke mũ. Kejẽn ag tóg êg vóg kónãn ke mũ. Kejẽn êg tóg kókĩnkĩr ke mũ. Kejẽn êg tóg kur venh ke tũ nĩ gé. Kejẽn êg tóg kãgter kren ke mũ. Kejẽn ag tóg êg kãmĩ ù tén ke mũ. Jérĩn mỹ êg tóg Cristo tovãnh ke tũ nĩ. Kỹ tóg êg tovãnh ke tũ nĩ gé, Jesus Cristo ti. Êg to há nĩn kỹ tóg nĩ nĩ.

³⁶ Kejẽn êg tóg ti jagy tag vég tĩ, hã kỹ tóg rán kỹ nĩ, ha mẽ: “êg tỹ ã to há nỹtĩ tugnĩn ag tóg êg tén sór tĩ, kurã kar ki. Ag mỹ êg tóg carneiro ri ke nỹtĩ. Carneiro tãnh êg tóg tĩ, êg tỹ ko jé. Vẽnh mẽg ri ke êg nỹtĩ, ag mỹ, êg tỹ ã to há nỹtĩ tugrĩn,” he ja tóg nĩ, Topê vỹ rá ki. Hã ra tóg ge nĩ.

³⁷ Hã ra tóg tỹ nén ù tũ nĩ, êg mỹ. Ti hã ne êg tar han tĩ', ù tỹ êg to há tãvĩ nĩ tĩ. Hã kỹ tóg êg mỹ sér tĩ, êg tỹ nén jagy vég mũ ra, ti tugrĩn.

³⁸ Ha vé, tag ki kanhró sóg nĩ, ha mẽ. Nén ù pi(jé) Topê tỹ êg to há nĩ tag tỹ tũg' henh mũ', ha mẽ. Êg ter mũ ra tóg êg to há nĩ, êg ter tũ ra ke gé. Topê tỹ

jěně jafã ag vỹ Topě tỹ ěg kato tẽ han ki kagtĩg nỹtĩ gé. Japo ag vỹ ti tỹ ěg kato tẽ han ke tũ nĩ gé, ag tỹ han sór mũ ra. Pã'i kar ag vỹ tag han ki kagtĩg nỹtĩ gé. Ěg tỹ ũri nén ũ jagy vég mũ ra ěg tóg ti tovãnh ke tũ nĩ, kỹ tóg ěg to jũnh ke tũ nĩ gé, ěg tỹ kejěn nén ũ jagy tãvĩ vég mũ ra.

³⁹ Kanhkã tãn ag vỹ ti tỹ ěg to jũ han ke tũ nĩ gé, nũgme tãn ag ke gé, ag tỹ ti tỹ ěg to jũ han sór mũ ra. Topě tỹ nén hyn han ja kar vỹ ti tỹ ěg to jũ (jé) han ke tũ pẽ nĩ. Ěg to há nĩ kỹ tóg nĩ nĩ, ěg tỹ ěg Senhor tỹ Jesus Cristo ki ge kỹ nỹtĩn kỹ.

9

Topě tỹ Judeu ag kuprěg

¹ Nén ũ tó sór inh mũ gé, ha mẽ. Cristo vỹ ki kanhró nĩ, sỹ tónh ke mũ tag. Sỹ ki hã ke vễ, ón tũ sóg nĩgtĩ, kỹ Topě kuprĩg vỹ inh mỹ: “ki hã ã tóg tó,” he tĩ gé.

²⁻³ Ha mẽ, inh mré ke ag to sóg fe kaj tãvĩ nĩ, Judeu ag to, ag tỹ Jesus kato tẽn kỹ. Fỹ sóg tĩ, sỹ ag mũ ěkrén kỹ, inh mỹ tóg věnh kaga jagy ri ke nĩ, ha mẽ. Kỹ, Topě tỹ ag jagfy inh kato tẽ ra tóg inh mỹ há tĩ vễ, Jesus tỹ ěg jagfy ter ri ke, ag tỹ ti ki ge jé. Ti tỹ ag jagfy isỹ Cristo mré ke tũ han ra tóg inh mỹ há tĩ vễ. Tỹ ag tóg inh kanhkã pẽ nỹtĩ,

⁴ isỹ tỹ ag mré Israel krě nĩn kỹ. Tỹ ag tóg Topě krě ja nỹtĩ vễ, kỹ tóg ag mỹ ã jykre tar ven ja nĩ gé. Ag mré věnh jykre tỹ hěn ri ke han ja tóg nĩgtĩ, ag jyvěn ja tóg nĩgtĩ gé, kỹ ti vĩ tó tĩ ag vỹ rán ja nĩgtĩ gé, Topě vĩ ti. Ti jo ĩn pẽ han ja ag tóg nĩgtĩ, Jerusalém tá, krěm nén ũ kar pũn jafã. Ag mỹ tóg ã tỹ nén han ke ti kãmén ja nĩgtĩ.

⁵ Ëg jóg'jóg ve ag, ù tỹ vāsỹ Topě mré vēmén tĩ ag vỹ ag jóg'jóg ve nỹtĩ gé, kỹ Cristo vỹ tỹ ag kã ù nĩ gé, ag kanhkã, ti tỹ ga kri tĩg kỹ. Ëg kri ke kar vē, Cristo ti, Topě ti. Ti hã mỹ ãg vỹ há han ke mũ, to ãg krónh ke vãnħ nỹtĩ, ga kri, kanhkã tá ke gé, ti mỹ vỹ há han to. Amém.

⁶ Jesus kato tẽ ag tóg nỹtĩ ha, Israel ag, Topě tỹ ag jyvẽn ja ra. Hã kỹ tóg Topě tỹ ag mỹ tó há han ja tũ nĩ ve nĩ. Hã tũ vē hã ra. Ag hã ne to jykrén há han ja tũ nĩ', ti tỹ ag mỹ tó há han ja ra. Ëg tỹ to jykrén há han kỹ ãg Israel ag jykre ki kanhrãn mũ, ha mẽ: Israel krẽ ù tóg tỹ Topě krẽ pẽ tũ nỹtĩ, ha mẽ.

⁷ Hã ra ag tóg: “Abraão vỹ tỹ ãg jóg'jóg ve nĩ,” he tĩ, “hã kỹ ãg tóg tỹ Topě krẽ nỹtĩ, Abraão tugnĩn,” he ag tóg tĩ. Kygnẽ kỹ ag tóg tag tó tĩ, ha mẽ. Topě tóg Abraão mỹ: “ã kósin tỹ Isaque krẽ vỹ tỹ ã krẽ pẽ nỹtĩnh mũ,” he ja nĩ.

⁸ Hã ra Abraão vỹ krẽ e han ja nĩgtĩ, kósin pir tũ ti nĩ. Hã kỹ Abraão krẽ ù vỹ tỹ Topě krẽ tũ nỹtĩ, Abraão tỹ ag han ja ra. Û tỹ Topě ki ge kỹ nỹtĩ ag hã vỹ tỹ Topě krẽ nỹtĩ, Topě tỹ ùn kuprẽg ja ag.

⁹ Topě vỹ Abraão mỹ: “prỹg tũg kỹ sóg ã venh kãtĩg mãn ke mũ, kỹ Sara fi kósin vỹ kã nỹnh mũ sir, ha vemnĩ,” he ja nĩ. Topě tỹ Abraão mỹ Isaque mur ke tó jan hã vē, ti tỹ Isaque hã kuprẽg jan kỹ.

¹⁰ Kỹ tóg ge nĩ gé, ãg tỹ Rebeca fi krẽ to jykrén kỹ, Isaque prũ fi. Krẽ vēgni han ja fi nĩ, kỹ ag tóg tỹ ãg jóg tỹ Isaque krẽ kar nỹtĩ, ùn vēgni ja ag.

¹¹⁻¹² Kỹ ag mur tũg ki, ag tỹ ver nén ù han tũg ki Topě tóg ag mỹnh fi mỹ: “ùn mur vén ke mũ vỹ tỹ ù tỹ ti nón mur ke mũ ẽn krẽm ke jẽnh ke mũ, ha vemnĩ,” he ja nĩ. Topě tỹ fi mỹ tó kã ag tóg nén ù há

mré nén ù kórég han ja tũ nĩ ver. Ag mur tũg ki ke ja vĕ. Topĕ tỹ ěg mỹ ã jykre ven sór ja vĕ, hã kỹ tóg ag mur tũg ki tag tó ja nĩ. Ā tỹ nén to jykrén mũ ěn han ti tĩ, Topĕ ti. Kỹ tóg ã tỹ ùn kuprĕg sór mũ ěn hã kuprĕg tĩ gé, ag tỹ ver nén ù han tũg ki.

¹³ Hã kỹ tag tóg rán kỹ nĩ gé, Rebeca fi krĕ ěn ag to, ha mĕ: “Jacó to inh há nĩ, hã ra sóg ti jo mur ja tỹ Esaú to kórég nĩ,” he ja tóg nĩ, Topĕ vĩ rán ki.

¹⁴ Kỹ Judeu ag hỹn inh mỹ: “Topĕ jykre vỹ há tũ nĩ,” he sór mũ. “Kuryj tũ ti nĩ, ti tỹ vĕsóg ki nén to jykrén sór kỹ, ti tỹ ùn kuprĕg mũ ěn to,” he ag hỹn tĩ. Hã tũ vĕ hã ra.

¹⁵ Hã kỹ tóg Moisés mỹ: “isỹ ùn jagãgtãn sór mũ ěn hã jagãgtãn jé sóg ke mũ,” he ja nĩ, Topĕ ti.

¹⁶ Ěg tỹ to vãsãn tũ vĕ, ěg tỹ to tar nĩnh ke tũ vĕ. Topĕ tỹ vĕsóg ki ěg jagãgtãn hã vĕ.

¹⁷ Hã kỹ ga tỹ Egito tá pã'i tỹ Faraó to tag tóg rán kỹ nĩ gé, ha mĕ. “Ùn tar vỹ tỹ inh nĩ,” he ja ti nĩ, Topĕ ti, Faraó mỹ. “Ā tỹ sóg ùn tar han, vĕnh kar tỹ isỹ tỹ ùn tar nĩ tag ki kanhró nỹtĩ jé, isỹ ã vóg kónãn to, ã tar jĕ ra. Vĕnh kar tỹ inh jyjy mĕnh ke vĕ, hã jé sóg ã fĕg,” he ja ti nĩ, vãsỹ, Topĕ ti, Faraó mỹ.

¹⁸ Hã kỹ, Topĕ tỹ ùn jagãgtãn sór nĩn kỹ tóg ti jagãgtãn tĩ sir. Hã ra tóg ù tỹ mĕ jãvãnh ěn ti kutu kãfór han mũ sir, Faraó ri ke.

Topĕ tỹ ã tỹ nén han sór mũ ěn han tĩ

¹⁹ Kỹ Judeu ag hỹn inh mỹ: “kỹ ěg hỹn Topĕ tỹ ěg kuprĕg tũ tugrĩn kutu nỹtĩnh mũ,” he sór mũ. “Tĩ tugnĩn ke vĕ. Kỹ ti tỹ ne jé ěg vóg kónãn sór nĕ?” he sór ag hỹn mũ, ón kỹ Topĕ to vĩn kỹ.

20 Ha vé, ěpra ke vỹ tỹ ěg nỹtĩ. Ti vỹ kafãn ke tũ pẽ ěg tóg nĩ. Ti kaměg jé ěg tóg ke mũ. Ā tỹ nén han sór mũ ěn han ti tĩ.

Ěg rãnrãj to jykrén nĩ. Kejěn ěg tóg nén ũ han tĩ, go'or tỹ. Kỹ go'or tóg ěg mỹ: “isỹ kukrũ kórég han tũg nĩ, isỹ kukrũ sĩnvĩ han nĩ,” he tũ nĩgtĩ. Ěg vỹ kafãn ke tũ ti nĩ, go'or ti. Ěg tỹ tỹ nén han sór mũ ěn han ěg tóg tĩ, ti ki jěmě vãnh ěg nỹtĩ.

21 Go'or ũ tỹ ěg kukrũ sĩnvĩ han tĩ, ũ tỹ ěg kukrũ kórég han tĩ. Ěg tỹ nén han sór mũ ěn han ěg tóg tĩ.

22 Topě vỹ ěg rãnrãj tag ri ke han tĩ gé. Ti tỹ nén han sór mũ ěn han ti tĩ, ěg tỹ, ěg tỹ ti mỹ go'or tỹ kukrũ ri ke nỹtĩn kỹ. Ũ ag to tóg jũ tĩ, ěg kar tỹ ag ki ti tar nĩ to jykrén jé, ti jũ ěn ti, Topě ti. Kỹ tóg kãnhmar ag to jũnh ke vě vě, hã ra tóg ver ag to fe mág nĩ, ag kórég tãvĩ nỹtĩ ra, ti tỹ ũ to jũnh ke mũ ag. Hã ra tóg ag vóg kónãn ke mũ, ha vemnĩ.

23 Kỹ tóg ũ ag jagãgtãn mũ gé, vėnh kar tỹ ag ki Topě tỹ tỹ ũn há tãvĩ nĩ to jykrén jé, ěg há kar kãfór. Hã jé tóg ag kuprěg ja nĩgtĩ. Ti tỹ ag tỹ ũn mág han sór vě, ti mré.

24 Ěg hã vě sir, ũn kuprěg kỹ nỹtĩ tag ag. Hã kỹ tóg ěg mỹ vėnh vỹ jěně. Judeu ag kãmĩ tóg ěg mỹ vėnh vỹ jěně, fóg ag kãmĩ ke gé, kanhgág ag kãmĩ ke gé, ti tỹ ěg jagãgtãn sór kỹ.

25 Hã kỹ Oséias tóg tag tó ja nĩ, ha mě. “Vãsỹ ag vỹ tỹ inh mré ke tũ ja nỹtĩ, hã ra sóg ag mỹ: “inh mré ke vỹ tỹ ãjag nỹtĩnh mũ ha, isũ ag,” he sór mũ, he ti, Topě ti,” he ja tóg nĩgtĩ, Oséias ti. “Vãsỹ sóg ag to há tũ ja nĩgtĩ, hã ra sóg ag to há nĩnh mũ ha,” he ti.

26 “Vãsỹ sóg ag mỹ: “ãjag pi(jé) tỹ isũ nỹtĩ,” he ja nĩgtĩ. Hã ra sóg ag mỹ: “Topě krě vỹ tỹ ãjag nỹtĩnh

mũ,” henh ke mũ, “ũn rĩr nĩ ãn krẽ vỹ tỹ ãjag nỹtĩnh mũ,” he jé sóg ke mũ ag mỹ,” he ti, Topẽ ti,” he ja tóg nĩ, Oséias ti. Ti tỹ ù tỹ ùri Cristo ki ge kỹ nỹtĩ ag kãmén hã vẽ.

27 Kỹ Isaías vỹ Israel krẽ ag to tag tó, ha mẽ: “e ag nỹtĩ, Israel krẽ ag, rỹnhryj e nĩ ãn ri ke, goj kãmĩ pó rynthryj e nĩ ãn ri ke. Ge ra ag pipir nỹtĩnh mũ, ùn krenkren ke mũ ag.

28 Topẽ vỹ kãnhmar ã tỹ nén tó ja ãn han ke mũ, ga tag ki, kỹ tóg ag vóg kónãn kãn ke mũ, ùn e ãn ag, ag kórég nỹtĩn kỹ,” he ja ti nĩ, Isaías ti.

29 Kỹ tóg tag tó ja nĩ gé, ha mẽ: “ẽg tũg kãn kren ti, Topẽ ti, vẽn kar kri nĩ ãn ti. Hã ra tóg ẽg kãmĩ ùn pipir krenkren han ja nĩgtĩ. Cidade tỹ Sodoma tá ke ag tũg kãn ja tóg nĩ, Topẽ ti, cidade tỹ Gomorra tá ke ag ke gé. Kỹ tóg ẽg tũg kãn kren gé, ag ri kén, hã ra tóg ẽg kãmĩ ù krenkren han mũ,” he ja tóg nĩ, Isaías ti.

30 Oséias mré Isaías ag tỹ tó mũ vỹ ge nĩ, ha mẽ. Fóg ag, kanhgág ag pi(jé) vẽn jykre kuryj nón mũ ja nĩgtĩ'. Ge ra Topẽ tóg ag jagãgtãn kỹ ag mỹ vẽn pãte fón mũ ha, ag tỹ Jesus ki rã kỹ.

31 Ag jãvo Israel krẽ ag vỹ ãjag jykre hã tỹ Topẽ tỹ ag jyvẽn ki króm sór ja nĩgtĩ. “Ti vĩ han ẽg tĩ, kỹ tóg ẽg to há nĩ,” he ag tóg tĩ. Hã ra ag tóg ki króm kãn ja tũ nĩ, hã kỹ Topẽ tóg ag to há tũ nĩ, jérĩn mỹ.

32 Hẽ ri ken kỹ hỹn'? Ag tỹ ti ki ge ja tũ nĩn kỹ, hã kỹ tóg ag mỹ vẽn pãte fón ja tũ nĩ gé. Ag tỹ vêsóg ki Topẽ jykre ki króm sór ja vẽ. Hã kỹ ag tóg ón kỹ ki króm ja nĩgtĩ. Hã kỹ ag tóg Cristo kato tẽ nỹtĩ.

Pó ri ke ti nĩ, Cristo ti, ẽg tỹ tỹ krĩm ke jafã. Ag tỹ ti tỹ krĩm ke jan hã vẽ, hã vỹ: ti ki rã tũ, he mũ.

³³ Hã kÿ tag tóg rán kÿ nĩ, Jesus Cristo to, ha mẽ. “Pãnónh sĩ tÿ Sião pénĩn cidade ki sóg pó nĩm mũ, ag tÿ tÿ krĩm ke jé. Kÿ ag tóg, pãró tag tÿ ag tóg krĩm ke kÿ vár ke mũ sir. Hã ra ù tÿ ti ki rã mũ vÿ ã tÿ nén ve sór mũ ên venh ke mũ,” he ja ti nĩ, Topê vĩ rán ki, Jesus Cristo to.

10

Judeu ag tÿ Jesus ki ge kÿ krenkren ke

¹ Inh kanhkã', isÿ inh mré ke tÿ Israel tÿ krenkren han venh há tãvĩ tóg tĩ, hã jé sóg Topê mré vēmén tĩ.

² Topê vĩ han jé ag tóg vãsãnsãn mÿgtĩ, tag vég isóg nĩ nĩ. Hã ra ag tóg ki kagtĩg nÿtĩ, kÿ ag tóg êg tÿ nén han ke tũ ên han tĩ.

³ Vēsóg ki ag tóg vènh jykre kuryj to vãsãn sór tĩ. Hã ra ù tÿ êg mÿ vènh jykre kuryj nĩm sór mũ vÿ tÿ Topê ti nĩ. Tag ve sór tũ ag nÿtĩ, Topê tÿ êg mÿ nĩm ke tag. Hã kÿ ag tóg Topê kato vãsãnsãn mũ.

⁴ Cristo vÿ hur kãtĩg. Kÿ êg tóg ti ki ge kÿ nÿtĩn kÿ ti mÿ há nÿtĩ ha. Êg tÿ Topê tÿ vãsÿ êg jyvèn ki króm tugnĩn ke pijé'. Jesus Cristo ki rã tigrĩn ke vè.

⁵ Ha vé, Moisés vÿ Topê jykre si to tag rán, ha mẽ. “Û tÿ vènh jykre kuryj han kãn mũ vÿ rĩr nĩnh ke mũ, ù tÿ ge vÿ rĩr krÿg ja tũ venh ke mũ, ti tÿ Topê tÿ êg jyvèn tĩ ên ki króm kãn tugnĩn,” he ja tóg nĩ, Moisés ti. Hã ra êg tóg ki króm kãn ki kagtĩg nÿtĩ, hã kÿ êg tóg êg tÿ ki króm kãn sór mũ ra rĩr nĩnh ke tũ nĩ.

⁶ Êg tÿ Jesus ki rã tigrĩn êg Topê mÿ há nÿtĩ. Kÿ êg tóg: “ù nÿ hÿn kanhkã ra tũg mũ, Cristo pére kãtĩg jé?” henh ke tũ pẽ nĩ. Mur kÿ ti nĩ ha.

⁷ Kĩ ãg: “ũ nỹ hỹn vẽn kũpĩrĩg ag jamã ra tĩg mũ, Cristo rĩn mãn jé?” henh ke tũ pẽ nĩ gé. Rĩr mãn kĩ ti nĩ ha.

⁸ Tag tó jé ãg tóg ke mũ, ha mẽ: “jagy tũ ti nĩ, Topẽ vĩ ti, to jykrén há ti nĩ. Kãnhmar ãg tónh ke mũ, kãnhmar ãg to jykrén ke mũ, Topẽ vĩ to,” he jé ãg tóg ke mũ.

Topẽ vĩ tag hã tó sóg tĩ. “Jesus Cristo ki rã tugnĩn ãg krenkren ke mũ,” he sóg tĩ.

⁹ ãg krenkren jé ãg tóg Jesus to: “ãg Senhor vĩ tỹ ti nĩ,” henh ke mũ. Vẽn kar mũ ãg tónh ke mũ. Kĩ ãg tóg ãg fe tỹ ti ki rãnh ke mũ gé. Topẽ tỹ ti ter kar kĩ ti rĩn mãn ja tag vĩ tỹ ãg mũ ki hã ke nĩ, kĩ ãg kri fig mũ. Kĩ ãg tóg krenkren ke mũ sir.

¹⁰ ãg tỹ ãg fe tỹ ti ki rã kĩ ãg tóg ti mũ há nỹtĩ. ãg tỹ vẽn kar mũ ti kãmén kĩ ãg krenkren ke mũ sir.

¹¹ Hã kĩ tag tóg rãn kĩ nĩ, ha mẽ: “ãg tỹ ti ki ge kĩ ãg tóg ãg tỹ nén ve sór mũ ẽn venh ke mũ,” he ja tóg nĩ, Topẽ vĩ rãn ki.

¹² Vẽn kar mũ ke vẽn sir, vẽn vĩ tag. Judeu ag mũ ke vẽn, kar kĩ fóg ag mũ ke vẽn gé, kanhgág ag mũ ke vẽn gé. Tỹ tóg ãg kar Senhor nĩ mũr. Kĩ, ãg tỹ ti mũ nén ũ to vĩn kĩ tóg ãg mũ nén ũ tỹ hẽn ri ke nĩm ke mũ gé sir, ãg kar mũ.

¹³ Tag hã vĩ rãn kĩ nĩ gé, ha mẽ: “ãg tỹ ãg Senhor mũ: “inh kren han nĩ,” hen kĩ ãg krenkren ke mũ, ãg kar,” he ja tóg nĩ, Topẽ vĩ tỹ rãn kĩ nĩ ki.

¹⁴ ãg tỹ ti ki rã tũ nỹtĩ ra ãg tóg: “inh kren han nĩ,” he ki kagtĩg nỹtĩnh mũ vẽn. ãg tỹ ti vĩ mẽ ja tũ nỹtĩ ra ãg tóg ti ki ge ki kagtĩg nỹtĩnh mũ vẽn. ũ tỹ ãg mũ ti vĩ tó tũ nĩ ra ãg ti vĩ mẽnh ke tũ nĩnh mũ vẽn.

15 Topê tỹ ag jěgněg tũ nĩ ra ag tóg ěg mỹ ti vĩ tónh ke tũ nĩnh mũ vễ. Hã kỹ tag tóg rán kỹ nĩ, ha mẽ. “Ủ tỹ ěg mỹ Topê vĩ sér ma kãmũ ag junjun vĩ ěg mỹ sér pễ tĩ,” he ja tóg nĩ, Topê vĩ tỹ rán kỹ nĩ ki. Topê tỹ ã vĩ tó tĩ ag jěgně to ken hã vễ.

16 Hã ra ù ag tóg kri fi jãvãnh nỹtĩ gé, ag tỹ ón kỹ mễg mũ ra, Topê vĩ sér ti. Isaías vĩ ag to Topê mỹ tag tó ja nĩ. “Ěg jóg mág', inh vĩ mẽ jãvãnh ag nỹtĩ,” he ja tóg nĩ.

17 Hã kỹ tóg, ěg tỹ ti vĩ mẽ há han kar kỹ ěg tóg ti ki rã tĩ. Ěg tỹ Cristo kãme mẽ kỹ ěg ti ki rã tĩ.

18 Kỹ ãjag hỹn inh mỹ: “Judeu ag mỹ hễn ri ke mũn mẽ ja tũ nĩ, hã kỹ ag mỹ ti ki ge ja tũ nĩ?” he sór mũ, ãjag tỹ inh carta tag ve kỹ. Vó, mẽ kỹ ag nỹtĩ vễ. Tag vĩ rán kỹ nĩ, ha mẽ: “ga kar mũ ag tóg mẽ ja nĩgtĩ, ã vĩ ti. Ga fyr tá tóg jun gé, ã vĩ ti,” he ja ti nĩ, Topê vĩ rá ki.

19 Kỹ ãjag hỹn inh mỹ: “kỹ Judeu ag hễn ri ke mũn to jykrén há han ki kagtĩg nỹtĩ, ag tỹ mễg mũ ra?” he sór mũ, ãjag tỹ inh carta tag ve kỹ. Vó, ag tỹ to jykrén sór kỹ ag tóg to jykrén mũ vễ. Moisés vĩ ěg mỹ tag kãmén, ha mẽ: “Topê tóg fóg mré kanhgág to tag tó sór mũ, ha mẽ,” he tóg. “Ag vĩ tỹ isũ tũ nỹtĩ ver, hã ra sóg ag tỹ isũ han sór mũ, ãjag tỹ ag ve kỹ ãjag tỹ inh ki rã to én jé,” he tóg. “Fóg mré kanhgág ag vĩ ãjag mỹ krĩ tũ nỹtĩ, hã ra sóg ag to há nĩ sór mũ, ãjag tỹ ag tugrĩn jũgũ jé, he tóg, Topê ti,” he ja tóg nĩgtĩ, Moisés ti, Judeu ag mỹ.

20 Kỹ Isaías tóg tag tó mũ gé, fóg ag to, kanhgág ag to, ha mẽ. “Ủ ag tóg inh jãvãnh ja tũ nỹtĩgtĩ, hã ra ag tóg inh vĩ jěmễg mũ ha. Topê hễ ri ke tĩ? he ja tũ ag nỹtĩ, hã ra sóg ag mỹ inh vĩ jěnễg mũ ha, he

tóg, Topê ti,” he ja ti nĩ gé, Isaías ti. Pã'i ag kamêg vãnh kÿ tóg Judeu ag mÿ fóg ag mré kanhgág ag tÿ Topê ki genh ke tó ja nĩ, Isaías ti.

²¹ Kÿ tóg Israel ag to tag tó ja nĩ gé sir, ha mẽ: “kurã kar ki sóg ãjag mÿ: kunĩg, he tĩ. Hã jé sóg ãjag mÿ inh nĩgé ven tĩ, ãjag tÿ gĩr mÿ ãjag nĩgé ven tĩ ên ri ke. Hã ra ãjag tóg inh vĩ mẽ jãvãnh nÿtĩ'. Inh vĩ kafãn kónãn ãjag tóg mũ mÿr',” he ja tóg nĩ, Isaías ti, ti tÿ Judeu ag mÿ Topê vĩ tón kÿ.

11

Israel krê'krê pipir ag vÿ tÿ Topê tũ nÿtĩ

¹ Kÿ ãjag hÿn: “kÿ Topê mÿ ã povo tÿ Israel tovãnh kãn kÿ nĩ?” he sór mũ, ãjag tÿ inh carta tag ve kÿ. Vó, ag tovãnh kãn tũ ti nĩ. Hã vé, tÿ sóg Israel krê nĩ gé, hã ra sóg ti ki rã. Abraão krê'krê ù vÿ tÿ inh nĩ gé, ti kósin'kósin tÿ Benjamim krê'krê ù mÿr.

² Isovãnh ja tũ ti nĩ, Topê ti, hã kÿ tóg ã povo tovãnh kãn ja tũ nĩ. Nén kar han tũg ki tóg êg kuprêg ja nĩ, êg tÿ tÿ ti tũ nÿtĩ jé.

Elias to jykrén nĩ. Ti kãme tóg rán kÿ nĩ, Topê vĩ rá ki. Elias tempo kã Israel ag tóg Topê kato tẽ mũ. Kÿ ag tóg Elias kato tẽ mũ gé, ti tén jé. Hã kÿ tóg Topê mÿ tó mũ, Elias ti, kÿ tóg:

³ “Senhor’,” he mũ. “Ã vĩ tó tĩ ag kãgtén kãn ag huri, ã mÿ pũn jafã kókén ag huri ke gé. Inh pir mÿ sóg kren, kÿ ag tóg isén sór mũ ha ke gé. ã tovãnh kãn kÿ ag nÿtĩ,” he ja tóg nĩ, Elias ti, Topê mÿ, Israel ag to.

⁴ Hã ra Topê tóg ti mÿ: “krĩ kufy han tũg nĩ,” he mũ. “Û tÿ 7 mil (ke) vÿ ki nÿtĩ, ù tÿ isovãnh tũ ag, sÿ ùn kuprêg ja ag. Tag ag vÿ vãnh kãgrá tÿ topê

tỹ Baal mỹ: “Topẽ vỹ tỹ ã nĩ,” he ja tũ nĩ,” he ja tóg nĩ, Topẽ ti, Elias mỹ. Ti tỹ Israel pipir ag tỹ Topẽ tovãnh tũg ja ên tó vễ.

⁵ Ge ti nĩgtĩ, ùri. Pir ag nỹtĩ, Israel tỹ Topẽ to há nỹtĩ ag. Ti kato tễ kãn tũ ãg mỹr. Topẽ vỹ ãg jagãgtãn, kỹ tóg ãg kuprẽg, hã kỹ ãg tóg ti to há nỹtĩ, ãg pipir nỹtĩ ra, ãg tỹ tỹ Israel krẽ nỹtĩn kỹ.

⁶ ãg tỹ vễsóg ki han pijé', ãg tỹ to vãsãn pijé'. Topẽ tỹ vễsóg ki ãg jagãgtãn hã vễ. Ke tũ nĩ mũ ra tóg: “vễsóg ki sóg ãjag jagãgtãn,” henh ke tũ nĩ vễ. Hã ra tóg vễsóg ki ãg jagãgtãn.

⁷ Ge ti nĩ, ha mẽ, Israel ag vỹ ve sór ja nĩgtĩ, Topẽ tỹ ãg mỹ nén ù há ven ke ên ti, hã ra ag tóg venh ke tũ nĩ. Topẽ tỹ ùn kuprẽg mũ ag hã mỹ tóg ven tĩ, Topẽ ti. Jãvo ù ag tóg kutu nỹtĩ sir, ag tỹ Topẽ vĩ mẽ jãvãnh nỹtĩn kỹ.

⁸ Hã kỹ tag tóg rãn kỹ nĩ, Israel ag to, ha mẽ: “Topẽ vỹ ag krĩ tũ han, hã kỹ ag tóg ti vĩ rá vэг mũ ra to jykrén tũ nỹtĩgtĩ. Mẽg tũ ag nỹtĩ, ãjag nĩgrẽg ra. ùri ag tóg gen kỹ nỹtĩnh mũ ver,” he ja ti nĩ, Topẽ vĩ rãn ki.

⁹ Kỹ Davi vỹ Judeu ag to tag tó ja nĩ gé, ha mẽ: “Topẽ mỹ festa han ag tóg tĩ. Hã ra ag tóg ón kỹ ti mỹ festa han tĩ, kỹ ag tóg to sigse kỹ nỹtĩnh mũ, ag festa to. Ag sigse kỹ tóg ag vóg kónãn ke mũ, Topẽ ti. Krenkren ke tũ ag tóg nĩ.

¹⁰ Kutu ag nỹtĩ, to jykrén ke tũ pẽ ag nỹtĩ, kỹ ag tóg vễnh jykre kufy hã venh ke mũ, hã to ag jagtar nỹtĩnh mũ,” he ja tóg nĩ, Judeu ag to, Davi ti.

Judeu ag to é henh ke tũ ãg tóg nĩ

¹¹ Kỹ ãjag hỹn inh mỹ: “kỹ Topẽ mỹ Judeu ag tỹ nũgme ki vár ke tag ve sór mũ, hã jén mỹ ag mỹ

Jesus jēnē ja nī, ag tỹ ti tỹ prānh ke jé?" he sór mū. Vó. Hã ra ag tóg Topē kato tēgtē tĩ. Ti vỹ mranh ja ag tóg nỹtĩgtĩ, hã kỹ Topē tóg fóg ag mré kanhgág ag krenkren han sór mū, Judeu ag tỹ ag ve kỹ ti ki ge to én jé.

¹² Kỹ Judeu ag tỹ Topē vỹ mranh kỹ Topē tóg fóg mré kanhgág kar to há nĩ. Kỹ Judeu ag vỹ jagāgtar nỹtĩ. Ag nỹtĩg ja ki ũ ag kar vỹ Topē tỹ ag to há nĩ vég mū. Há ti nĩ, tag. Kỹ, Topē tỹ Judeu ag to há' he mǎn nĩ ra tóg hã ra ga kri mū kar mỹ há pē tãvĩ tĩnh mū vễ, mỹr, ha mẽ. Hã ra tóg ag to há tũ nĩ ver.

¹³ Kỹ sóg ājag mỹ tag tó sór mū, ājag tỹ tỹ fóg nỹtĩn kỹ, kanhgág ag mỹ ke gé. Ājag apóstolo vỹ tỹ inh nĩ, sỹ ājag mỹ Topē vỹ tó jé. Inh rānhrāj vỹ inh mỹ sér pē tĩ.

¹⁴ Isỹ ājag mỹ Topē vỹ tó kỹ inh mré ke ag hēn ri ke mūn ājag kóm Jesus ki ge sór mū gé, kỹ ag krenkren ke mū sir, Israel ag.

¹⁵ Ha vé, Topē tỹ inh mré ke ag tovānh to tóg povo ũ ag to há nĩ ha, ag to jũ mǎn tũ tóg nĩ sir. Topē tỹ Israel ag to há' he mǎn mū ra tóg vēnh kar mỹ há pē tãvĩ tĩnh mū vễ, kỹ vēnh kar vỹ rĩnrĩr mǎn ke mū vễ, ũn kǎgter mū ag mré hã. Hã ra tóg ag to há tũ nĩ ver.

¹⁶ Ĕmĩ to jykrén nĩ. Ĕmĩ kupar ko há nĩn kỹ tóg ko há kar nĩ. Ge ti nĩgtĩ gé, ka tỹ. Ti jāre há nĩn kỹ ka vỹ há kar nĩ. Israel ag vỹ tag ri ke nỹtĩ. Ag jóg'jóg ve ag vỹ ka jāre ri ke nỹtĩ. Topē mỹ ag há nỹtĩ ja nĩgtĩ, hã kỹ ag krē vỹ Topē mỹ há nỹtĩnh ke mū gé.

¹⁷ Povo tỹ Israel vỹ ka tỹ oliveira há ri ke nỹtĩ. Ti jāre vỹ há nĩ, hã ra ti pē ũ tóg kórég nỹtĩ. Hã kỹ tóg mrynhmranh kỹ vāvām mū, Topē ti, ti pē kórég ěn ti. Ti tỹ Israel kórég ag togvānh to ken hã vễ, hã vỹ:

ka pẽ kórég vāvãm, he mũ. Ka pẽ kórég tag nýtĩg ja ki tóg ka ù pẽ vin, vãnh kãmĩ ka tỹ oliveira pẽ tỹ, ùn kanẽn vãnh pẽ tỹ. Ājag hã vẽ sir, ājag tỹ tỹ fóg nýtĩn kỹ, kanhgág ag ke gé. Hã ra ka ù pẽ tag vỹ ka há jãre ẽn tỹ ti kume vég tĩ, kỹ tóg tỹ há' he mũ sir. Ājag tỹ Topẽ tỹ Israel jóg'jóg ve tỹ Abraão mỹ nén tó ja ẽn vég mũ to ken hã vẽ, hã vỹ: ka há jãre kume vég mũ, he mũ.

¹⁸ Kỹ Israel ag to é he sór tũg nĩ, Topẽ tỹ ag vãm mũ ra, ẽg tỹ ka pẽ kórég vãm ri ke. Ag nýtĩg ja ki ājag nýtĩ. Hã ra ka jãre vỹ tỹ Judeu ag jóg'jóg ve nýtĩ. Ājag jóg'jóg ve pijé', fóg pijé', kanhgág pijé'. Judeu ag vẽ. Kỹ Judeu ag to é he sór tũg nĩ.

¹⁹ Hẽn ri ke mũn ājag tóg inh mỹ: “hã ra tóg Judeu ag vãm, ẽg to há nĩ jé,” he sór mũ. “Hã kỹ tóg ẽg to há nĩ,” he ājag hỹn mũ.

²⁰ Hỹ, ag vãm tóg. Hã ra ag tóg ti ki rã jāvãnh ja nýtĩgtĩ, hã kỹ tóg ag vãm. Jãvo tóg ājag to há nĩ, ājag tỹ ti ki ge to. Hã kỹ ag to é he sór tũg nĩ. Topẽ kamẽg nĩ mỹr.

²¹ Israel krẽ ag tỹ ti ki ge jāvãnh tugnĩn tóg ag vãm. Ag jagãgtãn jāvãnh tóg nĩ ha. Kỹ tóg ājag jagãgtãn ke tũ nĩ gé, ājag tỹ ti ki ge to tar tũ nýtĩn kỹ. Hã kỹ ti hã kamẽg nĩ.

²² Hã ki Topẽ tỹ tỹ ùn há nĩ tóg ve há tĩ, hã ra tóg ù ag vóg kónãn jagy han tĩ gé. Û tỹ ti vĩ mranh mũ ag vóg kónãn jagy han tóg tĩ, Topẽ ti. Hã ra tóg sir ājag to há nĩ sir, ājag tỹ ti tovãnh tũ nĩn kỹ. Ājag tỹ ti tovãnh kỹ tóg ājag vãm ke mũ gé, ha vemnĩ.

²³ Judeu ag tỹ ti ki ge kỹ tóg ag to há nĩ mãn ke mũ gé sir, kỹ tóg ka há ki ti pẽ mrynhmráj ja ẽn ki vin mãn ke ri ke nĩ sir.

24 Ha vé, ãjag hã vỹ tỹ ka kanẽn vãn h pẽ ri ke nỹtĩ'. Hã ra tóg ka há ki ãjag vin, ãjag tỹ tỹ ka kanẽn vãn h pẽ nỹtĩ ra. Kỹ tóg, ti tỹ ka há ẽn pẽ mrynhmráj ja ẽn ki vin mãn sór nĩ ra tóg vin mãn mũ sir, ka há ẽn ki, hã vỹ: Judeu ag tỹ Jesus ki rã, he mũ. Ka há pẽ mrynhmráj ja ẽn ki vin mãn to ken hã vẽ. Ëg pi(jé) ka kanẽn vãn h pẽ tỹ ka kanẽn há ki vin tĩ'. Ëg tỹ ka há pẽ tỹ ki vin mãn tag vỹ jagy tũ nĩ vẽ. Hã kỹ tóg Topẽ mỹ jagy tũ tĩ, ti tỹ Judeu ag to há nĩ mãn kỹ.

Topẽ tỹ Israel ag krenkren han sór

25 Isỹ ãjag mỹ nén ù kãmén sór vẽ, ãjag tỹ mẽ ja tũ ù, ha mẽ. Sỹ ãjag mỹ kãmén sór vẽ, ãjag tỹ Judeu ag to é he tũ nĩ jé. Ha vé, Israel ù ag vỹ ver mẽ sór tũ nỹtĩ. Û ag tóg mẽ sór mũ, hã ra ù ag tóg mẽ jãvãn h nỹtĩ gé, vẽn h kar tỹ Topẽ vỹ mẽ jé, Judeu tũ ag kar. Kejẽn ag tóg mẽ kãn ke mũ, fóg kar, kanhgág kar ke gé.

26 Ag tỹ mẽ kãn ke ẽn kã Israel ag tóg krenkren ke mũ gé. Hã kỹ tag tóg ag to rán kỹ nĩ, ha mẽ: “ag krenkren han tĩ vỹ jun ke mũ. Pãnónh sĩ tỹ Sião pénĩn cidade ẽn tá tóg vẽn h ven ke mũ, ag krenkren han tĩ ti. Ën vỹ Jacó krẽ ag tỹ inh vỹ mranh ja ẽn tỹ vẽn h pãte fón ke mũ, Israel krẽ en ag mỹ.

27 Sỹ ag mré jykrén jan hã vẽ. Ag tỹ inh vỹ mranh tỹ sóg tũg' he mũ,” he ja tóg nĩ, Topẽ vỹ rá ki, Judeu ag to.

28 Jesus kato tẽ ag tóg mũ ver, ti kãme sér mẽ jãvãn h ag nỹtĩ ver, hã kỹ ãjag tóg ag nỹtĩg ja ki Topẽ vỹ sér mẽg mũ. Hã ra ag jóg'jóg ve ag vỹ Topẽ to há nỹtĩ ja nĩgtĩ, hã kỹ Topẽ tóg ag krẽ'krẽ to há nĩnh ke mũ ge kejẽn, ti tỹ vãsỹ ag kuprẽg ja nĩnh kỹ.

29 Topē tỹ ũ to há nĩn kỹ tóg ti to há nĩ, ti tỹ ũ kuprēg kỹ tóg kuprēg kỹ jē nĩ gé. Tỹ tũg' henh ke tũ ti nĩ, Topē ti.

30 Vāsỹ ājag tóg Topē vĩ ki kagtĩg ja nỹtĩgtĩ gé. Hã ra Topē tóg ũri ājag jagāgtãn, ājag tỹ ti ki ge jé, Judeu ag tỹ ti vĩ mranh ag nỹtĩg ja kã.

31 Kỹ ěn ag tóg ti vĩ mranh mũgtĩ ver, Topē tỹ kar kỹ ag jagāgtãn jé, ti tỹ ājag jagāgtãn ri ke.

32 Kỹ Topē tóg ěg kar mỹ ěg tỹ ti vĩ mranh mũ tag ven kãn sór mũ, ěg tỹ to jykrén mãn jé. Ti tỹ ěg jagāgtãn sór vĕ, ěg tỹ ti ki ge jé, hã jé tóg ěg mỹ ěg tỹ ti vĩ mranh mũ ven sór mũ.

Topē jykre tỹ ěg jykre kãfór nĩ

33 Topē vỹ tỹ ũn mág pĕ nĩ, mỹr, ha mĕ. Ti jykre vỹ vĕnh kar kri nĩ kar nĩ. Ve kãn jãvãnh ěg nỹtĩ, ti jykre ti, tá krỹg jãvãnh ěg nỹtĩ. Nén ũ kar ki kanhró ti nĩ mỹr, nén ũ kar to jykrén há han kãn ti tĩ mỹr. Ti tỹ nén to jykrén mũ ve kãn ke tũ pĕ ěg nĩ. “Ti hỹn hĕ ri ken kỹ tag han?” henh ke tũ ěg tóg nĩ gé. To jykrén kórég ěg tóg nỹtĩ.

34 Ũ nỹ Topē tỹ nén to jykrén mũ ki kanhró nĩ? Ki kagtĩg kar ěg nỹtĩ. Ũ nỹ Topē mỹ: “tag han ra, tag han tũg ra,” he tĩ? Ũ vỹ ti jyvĕn ke tũ pĕ nĩ.

35 Ũ nỹ ti mỹ nén ũ nĩm', Topē tỹ ti mỹ kajãm jé? Nén kar vỹ tỹ ti tũ nỹtĩ mỹr, hã kỹ tóg ěg hã mỹ nén ũ kar nĩm tĩ, ěg jagāgtãn kỹ.

36 Topē hã ne nén kar hyn han'. Ti hã jamĕn kỹ ěg tóg nỹtĩ, nén ũ kar vỹ ti jamĕn kỹ nỹtĩ gé. Hã kỹ ěg tóg tỹ ti tũ nỹtĩ gé, nén ũ kar ti ke gé. Kỹ ti hã ne tóg tỹ ũn mág nĩ', ti pir mỹ. Ti hã mỹ ěg tóg vĩ há han tĩ, to krónh ke tũ ěg nĩ, ga kri, kanhkã tá ke gé. Amém.

12

Topě mý ěg věnh fěg ke mǔ

¹ Inh kanhkā', Topě vỹ ājag jagāgtān. Hã kǵ sóg ājag mý: “ti mý věnh fěg,” he mǔ. Kǵ tóg ěg tỹ ti mý nén ũ pǔn ri ke nĩ, ěg tỹ ti mý věnh fěg kǵ. Judeu ag vỹ ājag mēg tǎnh kǵ pǔn tĩ. Ag jāvo ěg tóg ti mý ěg rĩnrĩr nýtĩn kǵ věnh fěg tĩ. Ti mý tóg sér tĩ, ěg tỹ tag han kǵ, ěg tỹ tỹ ti tũ nýtĩn kǵ sir. Gen kǵ ājag tóg Topě jykre han ke mǔ.

² Ěprā ke ag jykre han sór tũg nĩ. Topě vỹ ājag krĩ tǎg han sór mǔ. Věnh jykre tǎg han sór tóg mǔ. Kǵ ājag tóg nén há han ki kanhró nýtĩnh mǔ. Věnh jykre kuryj han já ājag tóg ke mǔ. Kygněnh ke tũ ājag tóg nĩ. Tag ve sór tóg mǔ, Topě ti. Tag hã to tóg ěg kanhrān ke mǔ.

³ Ha vé, Topě vỹ isar han, kǵ sóg ājag jyvěnh há han ki kanhró nĩ. Hã kǵ sóg ājag kar mý tag tó mǔ. Věsỹ ũn mág han sór tũg nĩ. “Tỹ inh ũn mág nĩ,” he tũg nĩ, ā tỹ tỹ ũn mág tũ nĩn kǵ. Ěg kar vỹ Topě ki ge kǵ nýtĩ, kǵ tóg ěg kar tỹ nén ũ to tar han tĩ, ěg kar tỹ ti rānrāj han já. Tag to jykren kǵ jagně to é he tũg nĩ.

⁴ Ěg há to jykren nĩ. Ti ki nýtĩ vỹ e nýtĩ, ěg pěn, ěg nĩgnó, ěg kaně, ěg nĩgrěg, ti kar ti. Ěg há ki nýtĩ vỹ jagně kóm rānrāj nýtĩ kar nýtĩ, vyr mý.

⁵ Ge ti nĩgtĩ, ěg mré. E ěg nýtĩ, hã ra ěg tỹ Cristo ki ge kǵ nýtĩn kǵ ěg tóg ěg há ri ke nýtĩ, kǵ ěg tóg jagně ki rĩr ke mǔ sir, ěg há ki nýtĩ tỹ jagně ki rĩr tĩ ěn ri ke.

⁶ Hã ra ũ tóg nén ũ han há nĩgtĩ, kǵ ũ tóg nén ũ ũ han há nĩgtĩ gé, Topě tỹ to ěg tar han kǵ. Ěg kāmĩ ũ mý tóg: “ag jyvěnh nĩ,” he tĩ, Jesus ti. Kǵ Topě tỹ ā mý

nén tó mũ hã tỹ ãg jyvẽn nĩ, ti tỹ ã mỹ: “ag jyvẽn nĩ,” hen kỹ.

⁷ ãg kãmĩ ù mỹ tóg: “ũn jagãgtar ag jagãgtãn nĩ,” he ti gé. Kỹ ãg jagãgtãn há han to tar nĩmnĩ. ãg kãmĩ ù mỹ tóg: “inh vĩ kãmén nĩ,” he tĩ gé. Kỹ to krónh ke tũg nĩ.

⁸ ãg kãmĩ ù mỹ tóg: “ag mỹ ag tỹ nén han ke kãmén nĩ,” he tĩ gé. Kỹ ã rãnrãj tag ki rĩr há han nĩ. ãg kãmĩ ù mỹ tóg: “ã tỹ nén ù nĩm mág nĩ, inh mỹ,” he tĩ gé. Kỹ ón kỹ ti mỹ nĩm sór tũg nĩ. ãg kãmĩ ù mỹ tóg: “culto to pã'i vỹ tỹ ã nĩ,” he tĩ gé. ã tỹ tỹ to pã'i nĩn kỹ to jykrén há han nĩ. ãg kãmĩ ù mỹ tóg: “ag jagãgtãn nĩ,” he tĩ gé. Kỹ ti tỹ ã mỹ ã tỹ ãg jagãgtãn ke tag tó kỹ to mỹ sér nĩmnĩ. ãg tỹ jagnẽ ki rĩr to ken hã vễ.

⁹ Jagnẽ to há tãvĩ nỹtĩmnĩ. Ón kỹ jagnẽ to há nỹtĩ sór tũg nĩ. Vẽnh jykre pãno to kórég tãvĩ nỹtĩmnĩ, kỹ tovãnh kãn nĩ. Vẽnh jykre há hã mũ mũmnĩ.

¹⁰ Jagnẽ to há pẽ tãvĩ nỹtĩmnĩ, ãjag tỹ jagnẽ mré pafa ja ag to há ri ke nỹtĩmnĩ, jagnẽ to. Jagnẽ mỹ koměr hã vĩmnĩ, ãg tỹ pã'i mỹ koměr hã vĩ ẽn ri kemnĩ, jagnẽ mỹ.

¹¹ Topẽ jykre to krónh ke tũg nĩ. Ti tỹ ãjag mỹ: “tag han ra,” he to jẽnjěr ke tũg nĩ gé, to vãsãn nĩ. Ti kuprĩg tỹ ãjag mỹ nén tó mũ ẽn ki króm nĩ, kỹ tóg ãjag mỹ sér tĩnh mũ. ãg Senhor tũ han nĩ.

¹² Topẽ vỹ ãg mỹ nén ù há kar han ke mũ. Tag to mỹ sér nỹtĩmnĩ. Kejẽn ãjag tóg nén ù jagy venh ke mũ, ti tugnĩn. Tag to krónh ke tũg nĩ. Topẽ mré vēmén kỹ nỹtĩmnĩ.

¹³ ãjag mré Topẽ ki rã ù jagtar nĩn kỹ ti jagãgtãn

nĩ. Ũ tỹ ãjag to pasa ke kỹ ti mỹ: “inh mré nĩ,” hemnĩ.

14 Kejĕn ũ tóg ãjag vóg kónān sór mũ. Ĕn to Topĕ mỹ: “ti jagāgtān nĩ,” hemnĩ. Ti to: “ti vóg kónān nĩ,” he tũg nĩ.

15 Kejĕn tóg ũ mỹ sér tĩ. Kỹ ti mré mỹ sér nỹtĩmnĩ gé. Kejĕn ũ tóg fỹ tĩ. Ti mré fỹmnĩ gé.

16 Jagnĕ mré vĕnh jykre pir hã han nĩ, hã vỹ: jagnĕ to há, he mũ. Vĕsỹ ũn mág han sór tũg nĩ. Tỹ ũn kãsir ag mré ke nỹtĩmnĩ. “Ag mré ke vỹ tỹ inh nĩ,” hemnĩ, ũn kãsir ag to. Hĕn ri ke mũn ãjag kãmĩ ũ tóg vĕnh kanhrān mág to tar nĩ, ãjag kãfór. Ti jé: “ag kãfór inh nĩ, vĕnh kanhrān mág ja tag to,” he tũg nĩ.

17 Kejĕn ũ tóg ãjag mỹ nĕn ũ kórég han tĩ. Ge ra ti mỹ nĕn ũ há hã han nĩ. Vĕnh kar mỹ vĩ há tãvĩ han nĩ, ũ tỹ ãjag to: “kygnĕ ti huri,” he tũ nĩ jé.

18 Vãsān nĩ, ãjag tỹ ũ to krĩ rỹ tũ nỹtĩ jé, ãjag tỹ vĕnh kar to krĩ kuprã nỹtĩ jé.

19 Inh kanhkã, ũ tỹ ãjag mỹ nĕn ũ kórég han mũ ra vĕnh kajām sór tũg nĩ. Topĕ hã tóg ã tỹ ti to jũnh ke ĕn ki kanhró nĩ'. Hã kỹ tag vỹ rán kỹ nĩ, ha mĕ: “inh hã ne ãjag kajām ke mũ', inh hã ne ag mỹ ven ke mũ', ag tỹ ãjag jykre kórég to jagāgtar ke ti, he ti, ĕg Senhor ti,” he ja tóg nĩ, Topĕ vĩ tỹ rán kỹ nĩ ki.

20 Kỹ ũ tỹ ãjag kato tĕ mũ mỹ nĕn ũ há kar han nĩ. Ti kókĩr nĩn kỹ ti mỹ vĕjĕn ven nĩ. Ti hãghã kỹ ti mỹ goj ven nĩ. Gen kỹ ã tóg ti mỹ'a pĕ han ke mũ, ha vemnĩ, ã tỹ ti to há nĩn kỹ, ti tỹ ã to kórég nĩ ra.

21 Ũ tỹ vĕnh jykre pãno han mũ ag vỹ ĕg kato tĕ tĩ. Kỹ ĕg tóg ag ki rĩr ke mũ, vĕnh kaja jé. Ag jagtar nỹtĩn kỹ ĕg tóg ag jagāgtān ke mũ. Ĕg tỹ ag jagāgtān

kỹ ag jykre pãno tóg ag mỹ vẽnhmỹ nĩnh mũ, ag tỹ ãg jykre ve kỹ, ha vemnĩ.

13

Ëg pã'i ag

¹ Ëg kri pã'i vỹ nỹgtĩ. Kỹ tóg ãg tỹ ag vĩ ki han há tĩ. Topẽ tỹ ag tỹ pã'i han hã vẽ, ag krĩn kỹ. Ti hã vỹ ù tỹ hẽ nỹ tỹ pã'i nĩnh ke to jykren tĩ'.

² Kỹ ag kato tẽ sór tũg nĩ. Topẽ hã vỹ ag vin tĩ, pã'i ag krĩn kỹ, kỹ ag kato vãsãn tũg nĩ. Û tỹ ag kato vãsãnsãn mũ ag vóg kónãn jé ag tóg ke mũ, pã'i ag.

³ Ëg tỹ vẽn jykre há han kỹ ãg tóg pã'i ag vэг mũ ra kanẽ jur han ke tũ nĩ. Û tỹ vẽn jykre kórég han mũ ag vỹ veso kanẽ jur tĩ, pã'i ag ve kỹ. Kỹ ãg hỹn hẽ ri kenh ke mũ, ag tỹ ãg kanẽ jun tũg jé? Vẽn jykre há tãvĩ han jé ãg tóg ke mũ, kỹ ag tóg ãg to vèmén há han ke mũ sir, pã'i ag.

⁴ Ëg pã'i ag ne ãg jyvẽn tĩ', ãg tỹ vẽn jykre há to tar nỹtĩ jé. Ag tỹ Topẽ tỹ ag mỹ nén tó mũn han hã vẽ. Æ tỹ vẽn jykre kórég han kỹ kanẽ jurmnĩ. Æ vóg konãn jé ag tóg ke mũ, ha vemnĩ, hã jé Topẽ tóg ag vin. Topẽ tũ ag vẽ, ag tỹ ùn jykre kórég han mũ ag vóg kónãn jé, ag tỹ ag jykre pãno to ag jagãgtar han jé.

⁵ Hã kỹ ag vĩ ki króm nĩ, ag tỹ ãjag to jũ tũ nỹtĩ jé. Æjag kakã kavénh ti tĩ gé, ãjag tỹ pã'i ag vĩ ki króm tũ ên ti. Hã kỹ ki króm sórmnĩ.

⁶ Kỹ governo mỹ imposto kajãm nĩ gé. Topẽ tỹ ag mỹ vẽn rãnrãj nĩm ja ên han ag tĩ, kurã kar ki, pã'i ag, governo mỹ rãnrãj tĩ ag. Kỹ ag mỹ kajãm nĩ.

⁷ Kÿ ãjag név(e) kajãm kãn nĩ, governo mÿ ke gé. ãjag tÿ pã'i ù mÿ imposto kajãm ken kÿ ti mÿ ven nĩ, jãnkamy ti. ãjag pã'i ag kamẽg nĩ, ag mÿ komẽr hã vĩmnĩ.

Topẽ jykre hã mĩ mũmnĩ

⁸ ãjag név(e) kajãm kãn nĩ. Mré hã jagnẽ to há tãvĩ nÿtĩmnĩ gé. Jagnẽ to há nÿtĩ to krónh ke tũg nĩ. Ëg tÿ jagnẽ to há nÿtĩn kÿ ãg tóg Topẽ tÿ ãg jyvẽn ja ên ki króm kãn mũ sir.

⁹ Ha vé, Topẽ tóg ãg mÿ: “ã prũ tũ fi mré nÿ tũg nĩ, kÿ ã mén tũ mré nÿ tũg nĩ gé,” he ja nĩ. Kÿ tóg: “ũ tén tũg nĩ, nén ù péju(g) tũg nĩ, ù to ón tũg nĩ, nén ù to én tũg nĩ gé,” he ja nĩ gé. Ti tÿ ãg jyvẽn vÿ e nÿtĩ. Hã ra ãg tÿ ti tÿ ãg jyvẽn kar tÿ tó pir han sór kÿ ãg tóg tag tónh ke mũ, ha mẽ: “ã régre ki rĩr nĩmnĩ. ã tÿ vẽn ki rĩr há ri ke han nĩ, ã régre ki,” he jé ãg tóg ke mũ.

¹⁰ Ëg tÿ ãg régre kar ki rĩr há nÿtĩn kÿ ãg tóg ag mÿ nén ù kórég han ke tũ nĩ. Hã kÿ ãg tóg jagnẽ ki rĩr há nÿtĩn ki Topẽ tÿ ãg jyvẽn tĩ ên ki króm kãn ke mũ.

¹¹ Vãsãn nĩ. Vẽn jykre kórég tovãnh kãn nĩ. Ti tÿ ãg kren han ke kurã vÿ kakó pẽ tĩ ha. Ëg tÿ ti ki ge vẽn kÿ tóg ver kór gy nÿ ja nĩ, kuvar gy nÿ ja tóg nĩ ver ên kã, hã ra tóg ùri kakó tãvĩ tĩ ha.

¹² Ti kãtĩg to hã tóg ãg mÿ kuty ri ke nĩ. Kuty tag vÿ tũg ke nẽ ha, tÿ vaj ke ti nÿ ha. Ti tÿ kãnhmar kãtĩg ke to ken hã vẽ. Hã kÿ ag tÿ kuty kã nén han tĩ ên han mãn sór tũg nĩ, vẽn jykre kavéj ên ti. Ëg tÿ kurã ki nén han jafã ên han nĩ, vẽn jykre kuryj ti, ãg tÿ vẽn jykre há han kÿ vẽn jykre kórég kato tẽ jé, tÿ tũg' he jé.

¹³ Ęg tỹ kurã mĩ tĩg há han tĩ ěn ri ke han nĩ. Ag tỹ baile ki nén ũ věnhmỹ han tĩ ěn han tũg nĩ. Kronkron tũg nĩ gé. Fag to ěn tũg nĩ, kỹ fag mré nỹ tũg nĩ, ag mré ke gé. Jagně to jũ tũg nĩ gé, jagně tũ to ěn tũg nĩ gé.

¹⁴ Ęg Senhor tỹ Jesus Cristo jykre tãg hã han nĩ. Ęg tỹ nén to ěn mũ ěn han sór mãn tũg nĩ. Ęg jykre si tovãnh kãn nĩ.

14

Jesus ki ge kỹ nỹtĩ fag tỹ jagně to há nỹtĩnh ke

¹ ũ tóg krój nỹtĩ ver. Jesus jykre ũ tóg ver ag mỹ jagy tĩ, ag tỹ ti ki ge kỹ nỹtĩ ra. ũ tỹ ge tovãnh tũg nĩ, ag mỹ: “ěg mré Topě vĩ mēnh kãtĩg nĩ,” hemnĩ. Ag vĩ kafãn tũg nĩ hã ra, ag tỹ kygně kỹ: “tag tóg inh mỹ ge nĩ, ge nĩ,” he mũ ra.

² ũ mỹ tóg nén kar ko há tĩ, hã ra ũ tóg nén ũ nĩ ko vãnh nĩn kỹ ěkré hã ko tĩ. “Vēnh kãggrá mỹ ag tóg pũn ja nĩ, vēnh mēg ěn nĩ ti, ag tỹ ón kỹ topě kãggran ja ěn mỹ, hã kỹ sóg ti nĩ ko sór tũ nĩ,” he ag tóg tĩ, ũn krój ag.

³ Hã ra ãjag kãmĩ ũ ag tóg ge ra ko tĩ, vēnh kãggrá tỹ ag mỹ tỹ nén ũ tũ nĩn kỹ. Ājag tỹ ko kỹ ũ tỹ ko vãnh ěn to é he tũg nĩ. Kỹ ãjag tỹ ko sór vãnh kỹ ũ tỹ ko mũ ěn to: “tĩ kórég han ti tĩ,” he sór tũg nĩ gé. Vějēn to jagně mỹ vĩ tũg nĩ. Ā mré tóg Topě ki rã kỹ jě gé, ũ tỹ ko mũ ti, kỹ ti to vĩ tũg nĩ.

⁴ Jesus mỹ rãnhraj tĩ vỹ tỹ ěg nỹtĩ, ěg kar, hã kỹ tóg vēnhmỹ tĩ, ěg tỹ jagně to vĩ sór kỹ. ũ tỹ ěg mỹ vĩnh ke mũ vỹ tỹ ěg Senhor ti nĩ, ěg tỹ tỹ ti tũ nỹtĩn kỹ. Hã ra ěg kar vỹ há kutě kãn ke mũ, kurã ěn kã, ha vemnĩ, ěg Senhor tỹ ěg tar han kỹ.

⁵ Û tóg vėnh kán ke kurã to: “kurã kórég,” he tĩ, kurã ù to ke gé. Jãvo ù tóg kurã kar to: “kurã há,” he tĩ gé. Há kar ti nýtĩ, ãjag tỹ kurã han mũ ti. Kỹ ãjag tỹ nén to jykrén mũ ěn hã han nĩ.

⁶ Ěg kar vỹ ěg Senhor jykre mũ mũ sór mũ, hã kỹ ù tóg kurã kórég han sór tĩ, ti jykre mũ tĩ jé, jãvo ù tóg kurã kórég han vãnh nĩ, ti jykre mũ tĩ jé gé. Há kar ti nĩ.

Kỹ ù tỹ nén ù kar ko mũ vỹ ge nĩ gé. Ěg Senhor jykre mũ tĩ hã jé tóg ko tĩ gé. Ti hã mỹ tóg to vĩ há han tĩ, vėjėn to, Topě hã mỹ. Û tỹ nén ù nĩ ko vãnh ěn vỹ ěg Senhor jykre mũ tĩ hã jé ko vãnh nĩ gé, ti tỹ ti mỹ há nĩ jé. Kỹ tóg to Topě mỹ vĩ há han tĩ gé. Há kar ti nĩ, ěg tỹ nén ù nĩ ko mũ ti, ěg tỹ ko vãnh ti ke gé.

⁷ Ěg pi(jé) ěg jykre han ke mũ', ěg tỹ ga kri mũn kỹ. Kỹ, ěg ter ken kỹ ěg pi(jé) ěg jykre ki ter ke mũ gé'.

⁸ Ěg tỹ ga kri mũn kỹ ěg tóg ěg Senhor jykre hã han ke mũ. Ti tũ han hã jé ěg tóg ga kri mũ nĩ. Kỹ, ěg ter ken kỹ ěg tóg ti jykre hã ki ter ke mũ gé'. Hã kỹ ěg tóg tỹ ti tũ kar nýtĩ sir, ěg tỹ ga kri mũn kỹ ke gé. Ěg Senhor tỹ Jesus Cristo tũ vỹ tỹ ěg nýtĩ.

⁹ Ěg tỹ tỹ ti tũ nýtĩ hã jé tóg ter ja nĩ. Hã jé tóg rĩr mãn ja nĩ gé. Ti tỹ tỹ ěg Senhor nĩ hã jé tóg ter ja nĩ, vėnh kar pã'i, ùn rĩnrĩr mũ ag pã'i, ùn kãgter ja ag pã'i ke gé.

¹⁰ Kỹ ãjag tỹ hẽ ri ke jé jagně to vĩ sór nẽ? Ĥjag tỹ hẽ ri ke jé jagně to é he nẽ? Topě hã vỹ ěg jykre ve kãn ke mũ, ěg kar, ti tỹ ěg jé prěr ken kỹ.

¹¹ Hã kỹ tag tóg rán kỹ nĩ, ha mẽ. “Rĩr inh jẽ nĩ,” he tóg, ěg Senhor ti. “Vėnh kar vỹ inh krēm grĩnh

kenh ke mũ, ha vemnĩ. Věnh kar vỹ inh mỹ: “ũn mág vỹ tỹ ã nĩ,” henh ke mũ, he ti, Topě ti,” he tóg, Topě vỹ tỹ rán kỹ nĩ ki.

¹² Ěg kar vỹ Topě rĩnja tá nỹtĩnh ke mũ, kỹ tóg ěg jykre tugnỹm ke mũ. Ěg hã ki tóg jěměnh ke mũ, ěg tỹ nén han ja ěn to.

¹³ Hã kỹ jagně to vỹ mãn tũg nĩ.

Ěg tỹ jagně to fen ke

Jagně to: “kórég ti nĩ,” he mãn tũg nĩ. Ājag tỹ nén ũ han ken kỹ tag to jykrén nĩ, ha mẽ. “Isỹ tag han kỹ inh régre mỹ inh ve kỹ Topě vỹ mranh ke tũ nĩ vỹ?” he jé ěg tóg ke mũ. “Ti mỹ tỹ prãnh kenh ke tũ nĩ vỹ, isỹ tag han kỹ?” he jé ěg tóg ke mũ.

¹⁴ Tag ki kanhró inh nĩ, ha mẽ: “vějěn pi(jé) ěg kavénh tí.” Jesus tỹ tón hã vễ. Nén ũ tũ vễ, vějěn ti, ěg tỹ ko jafã távĩ vễ. Hã ra ũ tóg nén ũ nĩ to: “věnh kãgrá mỹ ag tóg pũn ja nĩ, věnh mẽg ěn nĩ ti, hã kỹ sóg ko kỹ Topě vỹ mranh tí,” he tí. Ũ tỹ tag tó mũ jykre kavénh ti tí, ti tỹ ge ra kon kỹ.

¹⁵ Inh mỹ tóg tỹ Topě vỹ mranh tũ nĩ, isỹ nén ũ nĩ ko tag ti. Kỹ sóg ko' he mũ sir. Kỹ inh régre ũ tóg isỹ ko mũ ve kỹ ko sór mũ gé sir, hã ra tóg ti hã mỹ Topě vỹ mranh ri ke nĩ. Kỹ tóg ko kỹ isugrĩn Topě vỹ mranh mũ sir. Kỹ tóg nũgme ki kutěnh ke mũ sir, ti tỹ ko kỹ Topě vỹ mranh kỹ. Kỹ tóg isỹ ti tén ri ke nĩ sir, Cristo tỹ ũn jagfy ter ja ěn ti. Isỹ tag han kỹ tóg sỹ ti to há tũ ri ke nĩ, isỹ inh jěn tugnĩn ti tén ri ke han kỹ.

¹⁶ Kỹ tag han sór tũg nĩ, ũ tỹ ājag tỹ nén han mũ to ājag to vỹ tũ nĩ jé. Há ti nĩ vễ, ājag tỹ kon kỹ, hã ra ũ tỹ ājag jěn to ājag to vĩn kỹ ko sór tũg nĩ.

17 Topě tỹ tỹ ěg Senhor nĩn kỹ ěg jẽn tóg tỹ nén ũ tũ nĩ ha mỹr, kỹ ěg tỹ nén ũ nĩ ko tũ ra tóg ěg mỹ tỹ nén ũ tũ nĩ. Nén ũ ũ to ěg jykrén ke mũ ha, hã vỹ: vẽnĥ jykre kuryj, he mũ, vẽnĥ jykre kusa, he mũ, vẽnĥ jykre sér, he mũ, Topě kuprĩg tỹ mỹr, ěg jagrě tãg ti.

18 Ěg tỹ gen kỹ Cristo jykre han kỹ tóg Topě mỹ há tĩ ha, ěg jykre ti, kỹ tóg ěg mré ěprã ke ag mỹ há tĩ gé sir, ha vemnĩ.

19 Kỹ ěg jé jagně krĩ kuprãg hã to jykrén. Ěg jé jagně tar han sór.

20 Kỹ tóg ěg tỹ nén ũ nĩ ko to ěg régre tỹ tỹ prãnh ke han kỹ tóg kórég nĩ, ěg tỹ ũ tỹ Topě ki rã kỹ nĩ ũ tỹ tỹ prãnh ke han kỹ. Vějěn kar vỹ há nĩ. Hã ra ũ tóg vějěn ũ to jykrén kónãn sór mũ, ti tỹ to Topě vĩ mranh kỹ. Ti tỹ ge ra kon kỹ tóg tỹ prãnh ke mũ sir.

21 Kỹ tóg kórég nĩ, ěg régre tỹ ěg tugnĩn Topě vĩ mranh kỹ. Hã jé nén ũ nĩ ko tũg nĩ, ã régre tỹ to tỹ prãnh kenh (ka) mẽ tĩn kỹ. Ti rĩnve vinho kron tũg nĩ gé. Nén ũ tỹ ã régre tỹ Topě vĩ mranh han ěn tovãnh kãn nĩ.

22 Ā tỹ nén ũ to: “kórég tũ ti nĩ,” hen kỹ Topě hã mỹ tómnĩ. Hã ra ã régre rĩnve han tũg nĩ, ti tỹ ã mỹ há nĩ ra, ã régre tỹ ã tugnĩn Topě vĩ mranh tũ nĩ jé. Ā tỹ Topě tỹ ã mỹ nén tó hã han kỹ tóg há nĩ, kỹ ã tóg jatũ nĩ, ha vemnĩ.

23 Ũ tóg ko tĩ, hã ra tóg ã tỹ ko mũ tag to: “isỹ Topě vĩ mranh ja mỹ vỹ?” he mũ sir. Ti tỹ ge ra ko kỹ tóg to krĩ kufy nĩ sir, kỹ tóg Topě vĩ mranh mũ sir. Ěg tỹ ti ki ge kỹ nỹtĩn kỹ ěg tóg ti tũ hã han sór mũ sir. Ěg tỹ nén ũ to: “tag han kỹ inh mỹ ti vĩ mranh mũ vỹ?” hen kỹ ěg han ke tũ nĩ, ke tũ nĩ mũ ra ěg ti vĩ

mranh mũ.

15

Ĕg tỹ ĕg mré ke ag to há nỹtĩnh ke

¹ Ha vé, tar ĕg nỹtĩ. Hã kỹ tóg ĕg tỹ ùn krój nỹtĩ ag to fen nỹtĩnh há tĩ. “Ĕn tóg inh mỹ há tĩ, hã kỹ sóg han sór mũ,” henh ke tũ ĕg tóg nĩ.

² “Mỹ inh régre mỹ há nĩ vỹ?” he jé ĕg tóg ke mũ. Ti tỹ ti mỹ há tũ nĩn kỹ ĕg han ke tũ nĩ. Ĕg tỹ ti tar han sór vĕ, ĕg tỹ nĕn han mũ kar tỹ.

³ Cristo pi(jé) ã tỹ nĕn to éen mũ ĕn han ja nĩgtĩ', hã kỹ tóg ĕg jagfy jagtar ja nĩgtĩ. Kỹ tóg Topĕ mỹ: “ã to ag tóg vĩ kónãn tĩ, ã kato tĕ ag, hã ra ag vĩ vỹ inh kri kutĕnh ke mũ,” he ja nĩ. Ti mur tũg ki Topĕ vĩ tó tĩ ù tóg ti vĩ tag rán ja nĩ, hã ra tóg ge nĩ.

⁴ Hã ra Topĕ tóg ĕg kanhrãn sór mũ, hã kỹ tóg ã vĩ tó tĩ ag mỹ: “ha rán,” he ja nĩgtĩ, hã kỹ ag tóg ránrán ja nĩgtĩ. Ĕn ve kỹ ĕg tar nỹtĩ, Jesus jykre mĩ mũ to, kỹ ĕg tỹ prãnh kenh ke tũ nĩ. Kỹ ĕg tóg ĕg tỹ kanhkã tá nĕn venh ke ĕn kã jatu' henh ke tũ nĩ gé.

⁵ Topĕ vỹ ĕg to fen kỹ nĩ. Ti hã vỹ ãjag tỹ jagnĕ to fen han ke mũ, ti kóm, ãjag tỹ ti mré jykre pir nỹtĩ jé, ãjag tỹ Jesus Cristo ki ge kỹ nỹtĩn kỹ. Ĕg tỹ to vãsãn han ki kanhró tóg nĩ, Topĕ ti.

⁶ Kỹ ãjag tóg jagnĕ mré ĕg jóg tỹ Topĕ to: “ùn mág vỹ tỹ ti nĩ,” henh ke mũ gé. Vĕnh vĩ pir han jé ãjag tóg ke mũ, ti to, ĕg Senhor tỹ Jesus Cristo to ke gé.

Fóg ag mré kanhgág ag tỹ Topĕ vĩ mĕnh ke

⁷ Hã kỹ jagnĕ to há nỹtĩmnĩ, Cristo tỹ ĕg to há nĩ ri ke nỹtĩmnĩ, jagnĕ to. Kỹ ù tóg ãjag jykre ve kỹ Topĕ to: “ùn mág vỹ tỹ ti nĩ,” henh ke mũ.

⁸ Tag to jykřén nĩ, ha mẽ. Cristo vỹ Judeu ag ki rĩr jé kãtĩg ja nĩ, ti tỹ Topẽ tỹ vãsỹ ẽg jóg'jóg ve ag mỹ nén tó ja ẽn ki han jé. Ẽn ve kỹ ẽg tóg ki kanhrãn mũ, Topẽ tỹ vẽn vĩ há hã tó tĩ ti.

⁹ Kỹ tóg povo ù ag jagãgtãn gé, kỹ ag tóg ti tugrĩn Topẽ mỹ vĩ há han mũ gé sir, fóg ag, kanhgág ag ke gé. Hã kỹ Davi tóg tag rán ja nĩ gé, ha mẽ: “tag tugnĩn sóg ã mỹ vĩ há han ke mũ, fóg ag rĩnve, kanhgág ag rĩnve ke gé. Ag rĩnve sóg ã mỹ jãn ke mũ, ã jé tó jé sóg ke mũ, ã jiji tó kỹ,” he ja tóg nĩ, Davi ti, Topẽ vĩ tỹ rán kỹ nĩ ki.

¹⁰ Kỹ tag tóg rán kỹ nĩ gé, ha mẽ. “Fóg', kanhgág', mỹ sér nỹtĩmĩ, Judeu ag mré hã, ti tũ ag mré hã,” he tóg mũ gé, Topẽ vĩ tỹ rán kỹ nĩ ki.

¹¹ Kỹ tag tóg rán kỹ nĩ gé, ha mẽ. “Fóg', kanhgág', ẽg Senhor mỹ vĩ há han nĩ. Topẽ to vĩ há han kãn nĩ, povo kar',” he ja tóg nĩ gé, Topẽ vĩ tỹ rán kỹ nĩ ki.

¹² Kỹ Isaías vỹ Cristo to tag tó ja nĩ gé, ha mẽ: “Jessé krẽ'krẽ ù vỹ tỹ ùn mág jẽn h mũ, Davi panh ẽn krẽ'krẽ ù, kỹ tóg tỹ povo kar ag pã'i mág jẽn h mũ. Fóg ag vỹ kanhgág ag mré ti ki ge sór ke mũ,” he ja tóg nĩ, Isaías ti. Ti tỹ Jesus tón hã vẽ.

¹³ Topẽ hã ne ẽg mỹ ven ke mũ', nén ù há kar, hã kỹ tóg ẽg mỹ tó ja nĩ. Ti hã ki ãjag tóg ge kỹ nỹtĩ. Ti hã vỹ ãjag fe tỹ mřin kenh ke mũ, ti hã vỹ ãjag krĩ kuprãg ke mũ'. Topẽ kuprĩg vỹ tỹ ãjag jagrẽ nĩ, kỹ tóg nén kar han há nĩgtĩ. Ti hã vỹ ãjag tar han ke mũ', ãjag tỹ Topẽ tỹ ẽg mỹ nén ù há ven kenh ke ẽn to tar nỹtĩ jé, ãjag tỹ tag hã mĩ ẽkrén jé.

Paulo rãnrãj

14 Inh kanhkã', vënh jykre há han ký ãjag tóg nýtĩ. Isỹ ãjag mỹ tó tũg ki ãjag tóg ki kanhrãn ja nĩ. Vég isóg nĩ nĩ. Hã ký ãjag tóg jagnë jyvën ki kanhró nýtĩ gé.

15 Inh vënh rá tag ki sóg ãjag mỹ nén ù tỹ hën ri ke kãmén, ti tỹ inh mỹ sér tĩn ký, sỹ ãjag vég tũ ra. ãjag mỹ sóg kãmén há han, ãjag tỹ kã jatu tũ nĩ jé, ãjag tỹ mēg mũ tag kã. Topë ne tag to inh jënë', tag to tóg isar han'.

16 Inh jé prër tóg, isỹ povo kar mỹ Jesus Cristo kãmén jé. Ký sóg ti tũ ki rĩr jë nĩ, Topë vĩ sér tó sóg tĩ, fóg ag mỹ, kanhgág ag mỹ ke gé. Ag tỹ ti ki ge ký tóg ti mỹ sér tĩ, Topë kuprĩg tỹ ag tỹ ùn há han ký, ag tỹ tỹ Topë tũ nýtĩn ký. Inh rãnrãj hã vë.

17 Tỹ sóg Jesus Cristo rãnrãj han jafã nĩ, Topë tỹ isar han ký, ký inh rãnrãj tóg inh mỹ sér tĩ.

18 Ký sóg ãjag mỹ Cristo tỹ inh mỹ vënh rãnrãj nĩm ja hã tỹ vëmén sór mũ. Fóg ag mré kanhgág ag tỹ ti ki ge jé tóg isar han tĩ, ti vĩ tó tag to. Inh vĩ mē ký ag tóg ti ki ge sór mũ, ag tỹ inh jykre ve ký ke gé. Jesus Cristo tỹ nén han mũn hã vë.

19 Milagre hyn han sóg tĩ gé, Topë tỹ isar han ký. Ti kuprĩg tỹ inh krĩn ký sóg hyn han tĩ, milagre ti. Milagre hyn han ký sóg vënh kar mỹ ti vĩ ti tó ja nĩgtĩ, Jerusalém tá, ký tá kãkutë ký sóg ga kar mĩ tĩg ja nĩgtĩ gé, ga tỹ Iliria mĩ hã. Vënh kar mỹ sóg Cristo kãme sér tó ja nĩgtĩ.

20 Û tỹ tá jun tũ ra sóg tá jun vén ja nĩgtĩ, sỹ tá ti vĩ tó vén jé, ag tỹ vãhã Cristo kãme mē jé, ù tỹ mē ja tũ ag. Inh hã ne ag mỹ tó vén sór ja nĩgtĩ', isỹ ù rãnrãj ja ki rãnrãj tũ nĩ jé.

21 Hã ký tag tóg rán ký nĩ, ha mē: “ù tỹ ti vëme mē

ja tũ ãn ag vỹ ti ki kanhrãn ke mũ. Ủ tỹ ti vĩ mẽ ja tũ ag vỹ mẽnh ke mũ,” he ja tóg nĩ, Topẽ vĩ rá ki. Sỹ ti vĩ tag hã ki króm sór vễ.

Paulo tỹ Roma ra tĩg sór

²² Hã kỹ sóg ãjag tá jun ja tũ nĩ ver, sỹ ãjag venh há hã ra.

²³ Hã ra sóg hur han kãn, tag ki inh rãnhrãj ti. Vãsỹ sóg to jykrén, sỹ ãjag venh tĩg jé.

²⁴ Kỹ tóg hẽn ri ke mũn inh mỹ ki króm ke mũ ha. Sỹ ga tỹ Espanha ra tĩg sór vễ, kỹ sóg ãjag venh rãn h mũ, ãpry kãkre ki, ãmĩn kãkre ki. Kỹ tóg há tĩ, ãjag tỹ inh jagãgtãn ken kỹ, sỹ ãjag tá jun ken kỹ. ãjag tỹ inh jagãgtãn há han kỹ sóg tĩg há han ke mũ, Espanha ra. Hã ra sóg ãjag mré nĩ sĩ han sór mũ, ãjag tỹ isar han jé.

²⁵ Hã ra sóg ver Jerusalém ra tĩg sór mũ. Sỹ tá Topẽ tũ ag mỹ jãnkamy ma tĩg ke vễ.

²⁶ Ga tỹ Macedônia tá Jesus mré ke ag vỹ inh mỹ jãnkamy vin, ga tỹ Grécia tá Jesus mré ke ag ke gé, isỹ Jerusalém tá ãn jagãgtar nỹtĩ ag jagãgtãn jé, jãnkamy ãn tỹ. ãg mré ke ag vễ gé, Jerusalém tá ãn jagtar nỹtĩ ag.

²⁷ Macedônia tá ke ag mỹ tóg sér tĩ, ag tỹ Jerusalém tá ke ag mré jãnkamy vẽn h kãpãm kỹ. Grécia tá ke ag mỹ tóg sér tĩ gé. Hã ra tóg inh mỹ há tĩ gé. Jerusalém tá ke ag vỹ Jesus ki ge vén, Judeu ag, kỹ fóg ag vỹ ag vĩ mẽ kỹ Jesus kãme mẽ ja nĩgtĩ. Hã kỹ fóg ag vỹ Judeu ag tũ mãn ja nĩ, hã vỹ: Topẽ vĩ, he mũ. Kỹ tóg há nĩ ha, ag tỹ mẽ kar kỹ ag mỹ ãjag tũ vẽn h kãpãm kỹ, vẽn h kaja jé, ag jãnkamy ti.

²⁸ Isỹ tag han kãn kỹ, sỹ ag mỹ jãnkamy tag vin kar kỹ sóg cidade tỹ Roma tá nĩ sĩ han kar kỹ ga tỹ Espanha ra tĩg sór mũ ha.

²⁹ Ha mẽ, isỹ ãjag ki jun ken kỹ Cristo vĩ vỹ ãjag mỹ sér tĩnh mũ, ãg tỹ jagnẽ mré ti to vēmén kỹ, isỹ ãjag mỹ ti vĩ tón kỹ, ha vemnĩ. Ti vĩ sér to tóg ãg mỹ sér tĩnh mũ.

³⁰ Inh kanhkã', ãg Senhor tỹ Jesus Cristo ki ge kỹ ãjag tóg nỹtĩ, kỹ ãjag tóg jagnẽ to há nỹtĩ gé, Topẽ kuprĩg tugrĩn. Kỹ sóg ãjag mỹ tag to vĩ sór mũ gé, ha mẽ. Iso Topẽ mré vĩmnĩ, inh mré, to krónh ke tũg nĩ.

³¹ Judéia tá ag vỹ e nỹtĩ, ù tỹ Jesus kato tẽ mũ ag, kỹ ag tóg inh kato tẽ sór mũ gé. Kỹ iso Topẽ mré vĩmnĩ, ti tỹ inh jy nĩgãn jé, Jerusalém tá ù tỹ Jesus ki ge kỹ nỹtĩ ag tỹ inh mỹ vĩ há han jé gé, ti tỹ ag mỹ há tĩ jé, sỹ jãnkamy ěn tỹ ag jagãgtãn sór mũ tag ti.

³² Tá kãtĩg kỹ sóg jatun mỹ ãjag ki jun ke mũ. Kỹ tóg ãg kar mỹ sér tĩnh mũ, sỹ ãjag to pasanh tĩg ken kỹ, Topẽ tỹ isĩg ke tag to há nĩn kỹ. Kỹ ãjag tóg isar han ke mũ sir.

³³ Topẽ vỹ ěg krĩ kuprãg tĩ. Kỹ sóg ti mỹ to vĩ tĩ, ti tỹ ãjag krĩ kãnhvy han jé. Amém.

16

Paulo tỹ ùn e mũ ěkrég tĩ

¹ ãjag mỹ sóg ěg mré ke fi tó sór mũ, Febe fi. Cidade tỹ Cencreia tá fi tóg Jesus ki ge kỹ nỹtĩ fag ki rĩr tĩgtĩ.

² Fi tỹ kejěn ãjag ki jun kỹ fi mỹ: “ha kãrã,” hemnĩ. ãjag mré fi tóg Jesus ki rã kỹ jẽ nĩ, kỹ fi mỹ nén tỹ fi

mỹ tũ ẽn ven kãn nĩ. Ủ tỹ hẽn ri ke jagãgtãn fi huri, inh ke gé.

³ Priscila fi mĩ sóg ẽkrég tĩ, fi mén tỹ Áquila mĩ ke gé. Inh mré fag tóg rãnrãj mág, Jesus Cristo rãnrãj han kỹ.

⁴ Isugnĩn fag tóg kãgter kren, inh jy nĩgãn jé. Tag hã mĩ sóg ẽkrég tĩ, kỹ sóg fag to há tãvĩ nĩ. Kỹ fóg kar kãmĩ Jesus ki ge kỹ nỹtĩ ag vỹ tag tugrĩn fag to há nỹtĩnh ke mũ gé, fag tỹ inh jy nĩgãn kỹ.

⁵ Fag ãn krẽm ù ag tóg vẽn h mãn tĩ gé, culto han jé. Ẽn fag ki sóg ẽkrég tĩ gé.

Iso há ù vỹ nĩ gé, hã vỹ: Epêneto, he mũ. Ga tỹ Ásia tá ù tỹ Jesus ki rã vén jan hã vẽ. Ti mĩ sóg ẽkrég tĩ gé.

⁶ Kỹ Maria fi vỹ nĩ gé. Ẫjag mỹ fi rãnrãj mág. Fi mĩ sóg ẽkrég tĩ gé.

⁷ Kỹ sóg Adrõnico mĩ ẽkrég tĩ gé, Júnias mĩ ke gé. Inh kanhkã ag vẽ. Inh mré ag tóg sigse kỹ nỹtĩ ja nĩgtĩ gé. Apóstolo ag kãmĩ ag tóg tỹ ùn mág nỹtĩ. Vãsỹ ag tóg Jesus ki ge jẽg, isỹ ti ki rã tũg ki.

⁸ Ampliãto mĩ sóg ẽkrég tĩ gé. Ti to inh há tãvĩ nĩ, ẽg Senhor tugrĩn.

⁹ Kỹ sóg Urbano mĩ ẽkrég tĩ gé. Inh mré tóg Cristo rãnrãj han tĩ. Kar kỹ iso há ù vỹ nĩ gé, Estãquis ti. Ti ki sóg ẽkrég tĩ gé.

¹⁰ Apeles mĩ sóg ẽkrég tĩ gé. Cristo tovãnh jãvãnh ja ti nĩ. Aristóbulo mré ke fag mĩ sóg ẽkrég tĩ gé.

¹¹ Kar kỹ inh kanhkã ù vỹ tá jẽ gé, Herodião ti. Ti ki sóg ẽkrég tĩ. Kỹ sóg Narciso mré ke fag mĩ ẽkrég tĩ, ù tỹ fag kãmĩ ẽg Senhor ki ge kỹ nỹtĩ fag.

¹² Kỹ sóg Trifena fi ki ẽkrég tĩ, Trifosa fi mĩ ke gé. Ẽg Senhor mỹ fag rãnrãj mũgtĩ. Kỹ sóg iso há tãvĩ

ũ fi mĩ êkrég tĩ gé, hã vỹ: Pérside, he mũ. Êg Senhor mỹ rãnrãj to fi tar tãvĩ nĩ.

¹³ Kĩ sóg Rufo mĩ êkrég tĩ. Topẽ ne ti kuprẽg', ti mỹnh fi ke gé'. Inh mỹ fi tóg tỹ inh mỹnh ri ke nĩ, ti mỹnh fi.

¹⁴ Kĩ sóg Asíncrito mĩ êkrég tĩ, Flegonte mĩ ke gé, Hermes mĩ ke gé, Pátrobas mĩ ke gé, Hermas mĩ ke gé, ag mré Topẽ vĩ mẽ jé vẽn hãn tĩ ag mĩ ke gé.

¹⁵ Kĩ sóg Filólogo mĩ êkrég tĩ, Júlia fi mĩ ke gé, Nereu mĩ ke gé, ti ve fi mré, Olimpas mĩ ke gé, kỹ ag mré Jesus vĩ mẽ jé vẽn hãn tĩ ag mĩ ke gé, Topẽ tũ kar ag mĩ.

¹⁶ Kỹ jagnẽ ki nhun ke ri ke han nĩ, Jesus mré ke kar ki, jagnẽ nĩgé kãgmĩ kỹ. Cristo ki ge kỹ nỹtĩ kar vỹ ãjag mĩ êkrég tĩ, ãmã kar ki ke ag.

Ón kỹ vẽn hãn vĩ há mẽ sór tũg nĩ

¹⁷ Nén ù tó sór sóg mũ gé ver ãjag mỹ. Û ag tóg ãjag tỹ jagnẽ to jũ han sór mũ. ãjag tỹ jagnẽ vĩ kafãn kónãn mũ han sór ag tóg mũ. Ag pi(jé) ãjag tỹ Topẽ vĩ mẽ ja ãn ri ke tó tĩ'. ãn ag vĩ mẽ sór tũg nĩ.

¹⁸ Ag pi(jé) êg Senhor tỹ Cristo rãnrãj han sór tĩ'. Ag nug hã ki rĩr ag tóg tĩ'. Ag vỹ vỹ mẽ há tĩ, ón kỹ, kỹ ù tỹ hãn ri ke ag tóg kri fi sór mũ, ag vỹ kri, ag tỹ ag jykre kórég ki kagtĩg nỹtĩn kỹ, ù tỹ nén ù vẽn hãmỹ to jykrén tũ ag. Inh mỹ tóg ag tỹ ù tỹ ge krĩn kónãn ha mẽ tĩ. Kỹ ag vỹ mẽ sór tũg nĩ.

¹⁹ ãjag tỹ Topẽ vỹ kri nĩm mũ tag vỹ mẽ há tĩ. Vẽn kar vỹ mẽ, kỹ tóg inh mỹ sér tĩ sir, ãjag to. Kỹ tóg ãjag tỹ vẽn jykre há ki kanhrãn mág nỹtĩn há tĩ. ãjag tỹ vẽn jykre pãno to jykrén tũ pẽ nỹtĩn kỹ tóg há tĩ gé.

20 Topě vỹ ěg krĩ kuprãg tĩ. Kãnhmar tóg ěg mỹ Satanás tỹ tũg' henh ke mũ gé, ha vemnĩ, kỹ tóg ãjag vóg mãn ke tũ nĩ ha.

Ěg Senhor tỹ Jesus mỹ sóg to vĩ tĩ, ti tỹ ãjag mỹ ã tỹ nén ũ há ěn vin jé.

Paulo mré ke ag tỹ Roma ki ke fag mĩ ěkrég tĩ

21 Inh mré Jesus rãnrãj han mũ tỹ Timóteo vỹ ãjag mĩ ěkrég tĩ gé, Lúcio ti ke gé, Jasão ke gé, Sosípatro ke gé, inh kanhkã ag.

22 Ũ tỹ Paulo mỹ tag rán mũ vỹ tỹ inh nĩ, hã vỹ: Tércio, he mũ. Kỹ sóg ãjag mĩ ěkrég tĩ gé, ãjag tỹ inh mré ěg Senhor ki ge kỹ nỹtĩn kỹ.

23 Gaio vỹ ãjag mĩ ěkrég tĩ. Ti ĩn krēm sóg jě, kỹ ěg tóg ti ĩn krēm culto han tĩ. Erasto vỹ ãjag mĩ ěkrég tĩ gé, ũ tỹ cidade jãnkamy ki rĩr tĩ ěn ti. Ěg régre tỹ Quarto vỹ ãjag mĩ ěkrég tĩ gé.

24 Ěg Senhor tỹ Jesus Cristo mỹ sóg to vĩ tĩ, ti tỹ ãjag kar tar han jé. Amém.

Topě mỹ ěg vĩ há han ke

25 Ha mẽ, ěg jé Topě mỹ vĩ há han. Ěg tar han ki kanhró tóg nĩ, ěg tỹ ti ki rã kar krónh ke tũ nĩn jé. Sỹ ãjag mỹ Topě vĩ sér tó mũn hã vě, Jesus Cristo kãmén kỹ. Vãsỹ ěg tóg mẽ ja tũ nĩ, ti vĩ sér tag ti. Ěg tỹ vãhã mẽ vě, Topě tỹ ěg mỹ to vėnh jykre nĩm kỹ. Prỹg tỹ hėn ri ke ki ag tóg mẽ ja tũ nỹtĩ, ěg jo ke ag.

26 Ũri hã ěg tóg mẽg mũ. Vãsỹ Topě vĩ rán tĩ ag vỹ ěg tỹ ũri mẽg mũ tag tó ja nĩgtĩ. Kỹ Topě tóg tag to: “povo kar mỹ kãmén nĩ, fóg ag mỹ, kanhgág ag mỹ, Judeu ag mré hã,” he ja nĩ, ěg tỹ mẽ kãn jé, ti ki ge jé, ti vĩ kri fi jé, ti tỹ tỹ ěg Senhor kar jě jé. Ā tỹ nén

kar han tũg ki tóg nĩ nĩ, Topẽ ti, ù tỹ ti han ja tũ (hã) ra. Kĩ tóg tũ' henh ke tũ nĩ gé. Gen kĩ tóg nĩ nĩ.

²⁷ Ti hã ne ã pir mũ nén ù kar ki kanhró nĩ', Topẽ ti. Jesus Cristo hã tóg ãg mũ Topẽ ven ke mũ. Kĩ ãg tóg ti hã mũ vĩ há han sór mũ, Topẽ hã mũ, kĩ tóg krỹg henh ke tũ nĩ, ãg tỹ ti mũ vĩ há han mũ ti. Amém.

Topẽ vĩa **New Testament in Kaingang (BR:kgp:Kaingang)**

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
16af52c8-0e45-5e91-b36c-cd314d36d7fc